

萬有文庫

第二集七百七種

王雲五主編

明詩紀事

(三十二)

陳田輯

商務印書館發行

明詩紀事

(三十二)

陳田輯

國學基本叢書

明詩紀事卷二十五

庚籤

陳昂七首

昂字爾瞻。一字雲仲。莆田人。世稱白雲先生。有白雲集七卷。

鍾惺秀軒集。白雲先生陳昂者。莆田黃石街人也。自隱於詩。獨與馬公子用昭善。先生詩所謂自天亡我友者。卽其人也。莆田中倭城且破。先生領妻子奔豫章。織草履爲日不給。繼之以卜。泛彭蠡。憩匡廬山。觀陶令之蹟。皆有詩。已入楚。由江陵入蜀。附僧舟備鑿以往。至亦輒備於僧。遂偏歷三峽。劍門之勝。登峨眉焉。所備僧輒死。反自蜀。寓江陵。松滋。公安。巴陵諸處。至金陵。姚太守稍客之。給居食。久之。姚太守亦死。無所依。賣卜秦淮。或自榜片紙於扉。爲人傭作詩文。而閩人林古度與其兄懋者。過其門。見所榜紙。突入其室。問知爲莆田人。頗述其平生。一扉之內。席牀缶竈。敗紙退筆。錯處其中。檢其詩誦之。是時古度雖年少。頗曉其大意。稱其一詩。輒反面向壁。流涕嗚咽。至於失聲。其後每過門。輒袖餅餌食之。輒喜。復出其詩。泣如前。居數年。竟窮以死。其子倉皇出覓棺衣。舁之中野。古度兄弟急走索其集。得先生手書五言今體一帙。其自序略云。昂壯夫時。尤嗜五言。第家貧無多古書。得王右丞卽誦讀。右丞得杜工部卽誦讀。工部問其所中規中矩者。時或一周旋之。又時或一折旋之。含筆腐毫。研精殫思。今觀其五言律七百首。則先生所學所得。實錄實際。盡此數言矣。論曰。明自有詩。而二三君子者自有其明詩。何隘也。畫地爲限不得入。自擅紳士大夫詩的的有本末者。非其所交遊品目。不使得見於世者多矣。況老賤晦辱之尤如陳昂者乎。近有徐渭。宋登春。皆以窮而顯晦於詩。詩皆遜昂。然未有如昂之窮者也。予嘗默思公織屨賣卜。傭備傭書時。

胸中皆作何想。其視世人紛紛籍籍。過乎其前者。眼中皆以爲何物。求其意象所在而不得。吾友張慎言曰。自今入市門。見賣菜傭。皆宜物色之。恐有如白雲先生其人者。甚矣有激乎其言之也。

馬之駿妙遠堂集。有明以來。詩之窮無如先生者。飢寒喪亂。容辱悲苦。種種皆備。有人之所未有。而情性足以副之。吾無以窺先生。獨見其手鈔原本。波畫枯硬。如燥枝斷蚓。而綴補篇彙。無一字苟則。先生之挫名憤世。所自託於不可知之人者。爲計工且遠也。

田按。白雲集孤迥清峭。稱其爲人。袁中郎識徐青藤。鍾伯敬推陳白雲。可謂孤情絕照。

步西林寺外

僧家論眞素。爭羨永禪師。翠谷一以憩。清風耿所思。菴荒虎迹出。塔敗鶴巢危。惆悵西林路。藤蘿礙接羅。

尋玉桂山避暑

燒春未易沽。酷暑應思避。散髮入幽林。解衣挂空翠。花間鳥語添。山頂鐘聲墜。消受冰谿風。徐徐涼夢寐。

與許處士同過故空公山院

昔與許玄度。同心事法師。一朝解蛻後。滿地落花時。苔路從風埽。松門爲雨欹。不堪舊行者。相送出山籬。

甘露寺步秋月潭夜深歸峯頂半峯菴僧房

秋月潭將暝。扶筇安適從。偶隨歸嶺鳥。遂遇隔谿鐘。徑密強千轉。崖高過百重。上方更盡到。漸漸白雲封。

夜泊

此地知何處。扁舟繫小亭。孤村低臥水。野屋大於瓶。卻少犂鋤樂。尙餘鋒鏑腥。白頭萬里客。仰愧老人星。

長干與二三小兒散步

小兒相聚樂。喧共野禽喧。采藻臨溪澗。看碑到寺門。尙寒三月景。微霽六朝村。帶有慵書物。花陰買綠樽。

步丁堰

不負生平癖。山嘉景遂嘉。澗行逢白石。谿渡拾青霞。犬吠三竿日。鶯啼萬樹花。此間如卜隱。先近賣漿家。

吳鼎芳十二首

鼎芳字凝父。吳人。有披襟倡和集。

列朝詩集。凝父爲詩。蕭閒簡遠。有出塵之致。與范東生刻意宗唐。刊落凡近。有披襟倡和集。行世。嘗與東生及子游菖溪。泛碧浪湖。入夾山濠。往返二十日。風清月白。苦吟清嘯。僅得七言絕句一首。其矜重自愛如此。後羅染從釋氏法。爲高僧以終。凝父與葛震甫稱詩於兩洞庭。皆能被除俗調。自豎眉目。震甫晚自信不篤。頗折入於鍾譚。而凝父亭亭落落。迥然塵埃之外。震甫自負才大。以爲入佛入魔。無所不可。竟不免墮修羅藕絲中。凝父修聲聞辟支果。雖復根器小劣。後五百年。終不落野狐外道也。

田按。凝父詩。刻露清新。明詩之晚秀者。

柳浪溪

山青秋雨後。人坐秋風裏。平沙下鷺鷥。簌簌動蘆葦。夜半明月光。漁舟弄空水。

靈源寺夜期朱雲從不至

美人雲壑期。禪宮夜無閉。林光忽如拭。碧月生雨霽。空色映潭心。天香出巖際。山童汲澗響。野鶴時一唳。幽意寄晨鐘。遙遙自相遞。

泊北固山下

夕陽江色遠。艤棹潮初退。獨客吟清秋。沙鷗冷相對。水氣上城根。風聲隱巖背。漁舟載煙火。撐入菱菱內。

開戶

開戶見清旭。茲晨欣偃息。前山夜來雨。蒼翠猶滴瀝。松際待歸雲。花邊跋幽石。時有會心處。嘯鳥破孤寂。

虎山菴答蔣十

偶坐已夕照。徘徊夜復深。西岑見新月。墮露聞松林。覺有幽人來。隔窗動微吟。

歸湖上

西風吹箬笠。無恙舊江天。白鳥飛破水。青山移近船。晚晴楓葉外。秋冷荻花邊。泊處堪遙指。柴門生野煙。

寄趙凡夫

十里寒山路。香風正采茶。偶隨樵客去。一到隱君家。細語生清月。閒心託片霞。別來湖水闊。秋色上蘋花。

向夕

日落荒塍外。天清古渡頭。丹楓飛一葉。秋色在漁舟。

月夜山中

山空春不知。雪霽夜猶冷。月上寺門開。一犬吠松影。

西湖竹枝詞

家家水葬綠楊隄。寒食寒煙奈鳥噓。白骨浪淘誰是主。年年花落段橋西。

弔蘇小小

塵消豔粉問遺碑。松柏西陵起暮思。留得蓮衣秋水上。半陂寒影弔鸕鷀。

送景周王孫還豫章

探菱歌斷雁初聞。一幅離帆趁夕曛。前路贈君秋色好。大江煙月小孤雲。

葛一龍十一首

一龍字震甫。吳人。國子生。入貲除雲南布政司理問。有尺木齋、修竹編、筑語等集。

列朝詩集。震甫入貲爲郎。久次選人。困於無資地。吳橋范質公典選。識其名。異而問之。曰。得非吳下詩人葛震甫。人呼爲葛髻者耶。乃得就選。除雲南布政司理問。正嘉之際。洞庭蔡九達爲清綺之詞。頗自異於文。祝諸賢。以爲獨絕。震甫聞而說之。刊落剪刻。欲追配於百年之上。已而年漸長。筆漸放。楚人譚友夏之流。相與尊奉之。浸淫徵逐。時時降爲楚調。可爲一喟也。

田按。震甫矜奇。尙不至如九達之誕。詩如斷港絕潢。時逢佳境。

送范東生之滇南

相念亦已苦。卻於離處逢。江聲撼獨往。客路趣殘冬。天盡山忽起。瘴開雲復重。館人蠻語接。計口給新春。

喜聖僕至

爲約每無憑。今宵喜得朋。片雲波上宅。殘雨夢中燈。春冷花如病。齋清客當僧。看山不待霽。把臂入煙層。

秋陰

西爽忽自晦。不知朝與昏。井上半殘葉。湖中無遠村。桔槔幾日罷。農牧相過存。雲淡一如水。野風吹到門。

秋晚石湖作

谿然十數里。一帆生雨西。蘋花如欲雨。日暮不堪攜。漁戶徧新郭。僧田帶越溪。依依爲別處。橋畔柳陰低。

舟泊處憶季昌稱孫同覺公凝父

野泊原無定。依稀識舊曾。店開煙市柳。船纜月溪藤。細雨生春漲。殘尊了夜燈。往時同泛客。誰似一瓢僧。

酬劉師蕃過訪

有客懽呼入。山童識舊知。相逢還自憶。爲別幾經時。露白酒香早。橘黃書到遲。僑居隔林巷。一過一如期。

懷王永啓先生

城均萬綠隱樓紅。滑滑鶯聲細雨中。養療儘堪銷暇日。歸心不待起秋風。茶香東道須名衲。山水西泠得

寓公過嶺梅花開一徧。喜無他訊累書空。

雨中九日賦得徧插茱萸少一人

蕭蕭颯颯動秋菰。風雨登臨事有無。佳節又來催綠酒。故人相問隔黃壚。氣昏小閣僧鐘冷。影斷江門客雁孤。滿著茱萸不堪把。只看霜色上頭顱。

宿吳門

市聲喧盡響風湍。篝火青青照夜寒。歸到江城猶是客。兩山殘雪夢中看。

舟夜憶梅

白日山中三百樹。一樹一杯曾遍看。今夜孤舟練川雨。瓦瓶篝火折枝寒。

立春前一日懷山中

四日新年一日春。新春還是舊年人。山中有屋何常住。逢著梅花便結鄰。

范汭八首

汭字東生。烏程人。有范東生集四卷。

露書。范東生詩。如楊柳當風。嫋嫋有態。

州朝詩集。東生徙居吳門。鑿池種竹。攻苦讀書。沈酣唐人之詩。諷詠其清詞麗句。苦吟精思。寢食盡廢。引洞庭吳凝父爲同調。

務盡刊甘醴肥厚。獻酬備儒之詞。視餘子蔑如也。輯全唐詩千餘卷。胹手瘵足。迄無甯夕。咯血以卒。年四十有四。擬父手定其集而爲之序曰。方東生苦吟時。收視返聽。馳情結思。不傍古。不緣今。不拘律。不適偶。一字不妥。寸心幾嘔。自簡鍊以至純粹。若繡錦未組。不異恆絲。及綵綯之具。鍼巧之飾。文章炫然。然後知爲神於法者也。

靜志居詩話。東生詩才。嫻雅如蠶犀結佩。可以辟塵。方之孟揚。允兆諸君。覺尤騰拔。
田按。東生詩。琢句練字。無浮音。無佻態。於七子未習。袁鍾流派。均無所染。

訪趙凡夫廬舍

無路覓君去。亂峯雲若屯。嵌空巢樹杪。鑿石沼山根。古帖從兒搨。新詩與姊論。閒門臨拱木。蒼翠自朝昏。
過武陵懷龍觀察

去指黔鄉近。回瞻楚甸遙。郡門臨白浪。驛路疊青霄。積雨寒初霽。長煙溼未消。征鞍停不可。無賴是今朝。
望茅山殘雪

華陽望不極。縷縷晴煙生。斜日半山雪。照人巾舄清。漸融仍合沓。近晦逾空明。強載筇輿去。搖搖人外情。

贈楊孝父

清時有隱者。自汲還自耘。翳然茅屋上。一片堯時雲。

滇中詞三首

秀海海邊葭蓼秋。滇池池上雲悠悠。人心恰似此中水。一道南流一北流。

鴛鴦浦綠水如苔。鏡裏人家向背開。五月饜僮剝雲去。三冬棘女擔花來。迤西之西天一涯。四時長有三春花。青帘颭處客沽酒。五歲女郎能數肥。

西家

蛾眉不掃鬢雲斜。含怨含情未破瓜。背倚曲闌花一樹。春光多少屬西家。

李能茂十首

能茂字允達。東陽人。知府學道子。有卑邇亭稿。武林倡和集。友疴山房集。

弇州山人續稿。允達詩以才氣勝。五七言古尤更奇絕。若五言得意時。翩翩建安矣。

吳之器藝書。能茂詩。七言如千花南浦吳娃醉。獨樹四陵越客過。平林夜火漁舟出。極浦秋聲雁陣移。五言如駿骨時名重。羊腸世路艱。雨勢滄江動。秋陰大麓長。路通秦望北。山斷禹陵西。皆雄健。有作者聲。

田按。允達服膺濟南。弇州專講氣格。而才力自健。有拔劍悲歌之氣。年三十餘而卒。可惜也。

再寄胡元瑞

落日下空山。狐兔交行迹。陰風動地來。荒草蒙昏色。中原幾萬里。莽蒼不可識。汗血紫驊騮。矯捷過飛翼。遭時甫多艱。躑躅原野側。天雞三四號。樽桑破微碧。長往豈復羈。時來難再息。朝發東海墟。暮憩崑崙澤。

貽斯惟武

蘭蕙揚芬芳。託根污泥塗。生質本自潔。內貞外不濡。寄心在浩蕩。叢累強支吾。芥草蔓華階。雨露滋榮敷。

貴賤非所較。徒以信區區。物理率互虧。怨尤以爲愚。造化豈異培。久近意固殊。淹沒百歲身。千載常斯須。俠客篇贈萬生

俠骨峻嶒雙眼碧。結束翩翩自顧惜。生好橫行不可當。片語風波坐相索。酒間絲竹調未終。擁妓忽過章臺中。豪華厭據七貴席。揮霍不數五陵雄。吳鉤灼爍霜紋錯。披髮悲歌意氣作。彎弓白日獵燕山。走馬清秋戲宛洛。回看世事但悠悠。黃金如山不復留。食魚偏輕彈鋏士。匕首羞藉將軍頭。路旁冠蓋紛若水。往來結客聲名起。當筵肝膽真一擲。七尺報恩向誰死。

養疴

數身成百折。指口定三緘。駿骨時名重。羊腸世路艱。病愁生白髮。窮淚落青山。別作生涯計。茅廬傍佛巖。
雨夜

朔雲猶浩浩。苦雨竟漫漫。急峽魚龍鬪。平沙雁鷺團。林聲先暮澀。嵐氣雜秋寒。惰骨兼沈病。飛蓬久不冠。
贈盧將軍洪秋

寶匣飛霜玉鹿盧。雄心曾復按邊圖。趨朝曉露侵金甲。入幕晴絲點繡弧。萬里鯨波消郡國。九關虎隊翼神都。豈應好武將軍事。爲奏饒歌出塞無。

酬李彥宏見和覺明寺寒夜之作

南山亦有被裘翁。黯淡清秋句最工。垂老名從高隱得。和歌身在酒狂中。逼除暮雪深齋外。回首寒雲大澤通。若道憐才誰解意。可知憔悴更相同。

從軍行三首

繞陣旌旂聲似雷。黃雲一騎射雕回。古來枉費孫吳法。別有將軍破虜才。材官都護盡橫戈。天子修邊按劍過。直北風塵衰草色。一時金鼓下交河。玉關西去莽蒼開。鐵甲雕弓陣陣排。戰罷不知歸路遠。霜天齊上李陵臺。

吳兆十首

兆字非熊。休甯人。有金陵、游閩、豫章、武林、姑蘇、東歸、廣陵、溪上、南遊等稿。

曹學佺石倉集。非熊古詩學謝靈運。沿及盧騷。近體類岑嘉州。字句尙覺實。余愛其未落韻時。散吟如援聲。令人淒絕。筆精。非熊能詩。而貧日甚。江湖十年。落魄不能爲歸計。有詩云。谷口鐘聲度嶺微。嶺頭嵐氣散朝暉。江山處處通鄉路。只是遊人不得歸。可謂深於貧者矣。

列朝詩集。非熊少警敏。喜爲傳奇詞曲。游少年場。推爲渠帥。萬曆中。遊金陵。留連曲中。與新城鄭應尼。作白練裙雜劇。譏嘲馬湘蘭。青樓人皆指目。有樊川輕薄之名。已而自悔。改弦爲歌詩。撫倣初唐。作秦淮鬪草篇。新安詩派。尸祝太函。肥膿相尙。不解爲何語。臧晉叔。曹能始見。而擊節。遂流傳都下。而能始於非熊。尤相得。借遊閩中諸山。及武夷。匡廬。九華。復還白下。其爲人率真自放。好窮山林花鳥之致。捉鼻苦吟。貴游雜坐。竟日諷詠。不知有人。久之。別能始歸新安。作東歸詩。已而復出游。訪故人於

嶺南客死新會。非熊詩評者謂其有二種。早年體華婉至。中歲清真灑灑。大要沈酣於六朝。唐人而傳之以性情。幹之以風調。工力並深。與象兼會。雖與能始同調。翦刻鎔鑄。意新理愜。能始似有間焉。能始序其詩。以爲古詩學靈運。沿及盧駱。近體學岑嘉州。字句少實。固宜其知之而未盡也。新安閔景賢采輯明朝布衣詩。推若上吳允兆爲中興布衣之冠。以予論之。親炙則孟揚。逖聽則非熊。庶無愧於此評。要當與千古共定之耳。

蠶尾續文。非熊五言。其源出於謝宣城。何水部。意得處時時近之。七言自秦淮鬪草篇而外。頗無可采。

靜志居詩話。非熊清而能麗。綺而不靡。最見賞於石倉。其風調亦相儷。

田按。非熊以秦淮鬪草篇得名。曆曆末詩家長篇。如徐興公玉主行。鄭翰卿半生行。林初文蛾眉篇。徐惟和帝京篇。俱有盛名。要不如非熊此篇爲最。牧齋推程孟陽與非熊爲明一朝布衣之冠。阮亭亦無異議。康熙中。汪洪度合二人詩刻之爲新安二布衣集。余謂非熊尙非孟陽敵。若謂二人爲明布衣之冠。更當置孫太初。謝茂秦輩於何地。無怪乎啓後人之訾議也。

春日留別柳陳甫諸社友

金陵風雅地。新亭送別所。飲餞悽已陳。江湄舟尙阻。雲樹含遠思。春山起別緒。征人戀故歡。舟子逐前侶。雲黯層城深。風轉孤帆舉。草積白鷺洲。花落梅根渚。嘉月子眷余。芳訊吾希汝。落日川之曲。悵望澹無語。

秦淮鬪草篇

樂遊苑內花初開。結綺樓前春早來。春色染山還染水。春光銜柳又銜梅。此時芳草萋萋長。秦淮女兒多閒想。閒想玉閨間。羅衣正試單。芳艷入戶吹帷動。巧鳥當窗攪夢殘。因嬌麗日長千道。相戲相耍鬪芳草。芳草市初齊。茸茸沒馬蹶。芳草遠如霧。望望迷人步。將綠將黃不辨名。和煙和霧那知數。鳳凰臺上舊時

基燕雀湖邊當日路。結伴踏春春可憐。花氣衣香渾作煙。誰分遲遲獨落後。誰能采采不爭前。嬾嬾桑間路。佳期何暇顧。悠悠秦淮水。遠道不遑思。空生謝客西堂夢。徒怨湘娥南浦離。未鳴鸚鵡先愁歇。乍囀倉庚正及時。正及時。愁先歇。密取畏人窺。疾行妨薜滑。入深翠溼衣。緣高香襲襪。塞若將何爲。束芻欲待誰。茜紅猶勝頰。萋白卻慙肌。薜荔裁衣安可被。菖蒲結帶豈堪垂。盈矰盈襜羅衆芳。蛾飛蝶繞滿衣裳。蘭皋借作爭衡地。蕙畹翻爲角敵場。分行花隊逐。對壘葉旗張。花花非一色。葉葉兩相當。君有麻與臬。妾有葛與藟。君有蕭與艾。妾有蘅與芷。君有合歡枝。妾有相思子。君有拔心生。妾有斷腸死。羸歸若个中。輸落阿誰裏。相向無言轉自愁。芳垌過雨忽疑秋。別本辭根何倚託。傾青委綠滿郊邱。雖殘已受妍心惜。縱賤曾經纖手摘。芍藥多情且自留。蘼蕪有恨從教擲。人生寵愛幾能終。人心安能採時同。縈愁結念尋歸逕。接珮連裙趁晚風。情知朽腐隨泥滓。會化深螢入幕中。

眞州江口望金陵

遠望何氤氳。棹歌風靜聞。情含極浦樹。魂逐渡江雲。草短鵝能數。沙乾鷗可羣。河橋將別酒。猶憶把羅裙。

正月十三夜同王若觀伎用來字

倡樓羅薦開。急管促行杯。花氣衣香奪。蟾光燭燄回。舞飛雕砌雪。歌落綺窗梅。不盡橫陳態。猶期三五來。

金陵客舍同江永叔吳建伯作時建伯臥病

旅館夜沈沈。涼風吹客心。殘燈垣樹影。微雨禁鐘音。以子病吟苦。兼余秋思深。離家纔幾日。江郭又聞砧。

送陳大理德遠奉使還端州

離亭別酒雁囀囀。星使何年帝里逢。歸路馬寒廬岳雪。驛樓人夢秣陵鐘。城臨錦水方迎櫂。家在荷山不廢農。惟有禰生狂似舊。嗟君去後復誰容。

無題

花暗橫塘有路通。斷腸箏送畫橋風。鴛鴦祇宿雙生樹。鸞鳳那棲半死桐。楚峽雲歸芳夢散。秦淮月在故樓空。別來聞說新粧束。學得蛾眉幾樣工。

留別朱道安徵信伯仲遊閩

章門一別欲何從。閩越溪山路幾重。麋鹿難馴隨野性。水雲無定任遊蹤。海晴峯出窺雙髻。雨後灘高過九龍。徒有離魂繞江樹。東湖明月上藍鐘。

西湖子夜歌

南峯望北峯。如歡又如儂。何當雲霧合。兩峯作一重。

登天臺峯

蘿磴松崖幾百層。猿攀魚貫始能登。昨朝望處今宵歇。巖下雲埋入定僧。

楊承鯤十二首

承鯤字伯翼，鄞人。國子監生。有西清閣詩草。

屬隆白榆集。讀伯翼近作，如吸日月之華，秀爽欲絕。僕縱觀海內作者，語工者格卑，氣勁者味短，尙纖儂則乏風骨，吐胸臆則傷體裁。作如牛毛，合如磨角，每得伯翼詩，便驚異寶。

甬上耆舊集。伯翼年十五，六爲諸生。沈嘉則一見奇之，曰：「今日建五丈旗，當以楊生居吾前，所謂獬兒難與爭鋒也。」因作戲贈楊伯翼詩，呼爲德祖，以是有重名。嘗以年家子謁王弇州，見其行卷，絕驚賞。伯翼默然竟別去。退與人言，王先生博大心慈，客持片楮求譽，輒津津不休，卽孺儒賈豎，人人謂王先生知己。僕尙容勗其間耶？伯翼文章高妙，詩于五言律更爲長城。

靜志居詩話。伯翼論文，謂先民有作，穀率存焉，不入穀率，雖工無當也。論詩厭博王、李，謂暗中摸索，知爲今人之詩，惟誦之不類今人，而不蹈古人之迹，斯善矣。譬如學書然，方其心摹手追，必盡肖古人，及其成也，不必盡肖乃成家，可稱知言者也。田按：王元美贈伯翼詩云：「愛讀西清草，新詩果自清。吐來珠照夜，琢就玉連城。禮樂從先進，文章畏後生。亦知楊德祖，不忝漢簪纓。推挹甚至萬曆中葉以後，世以王、李爲口實。若伯翼者，庶可以議王、李，而不至流爲鍾、譚之鬼趣也。」

江邨

圭華長林下，江邨落照間。夕風常滿樹，秋雨不繙山。拊拾歲時晏，謳歌稼穡艱。芙蓉涼更發，朝暮損紅顏。

度阿育王嶺

去去盤雲轉，高高望海行。到山千澗響，入谷萬花明。邱壑夢常往，煙霞疾未成。興來還不淺，翻劇子規鳴。

佛迹

嶙峋石氣蒸。殿場久無僧。仄徑盤雲入。荒碑覆雪崩。泉飛陰磴蘚。花落佛衣藤。始悟生生理。玄心已似冰。

天井寺

萬壑趨天漢。千盤到寺門。遠山存殿古。小姓見僧尊。想望真龍窟。尋常紫氣屯。來朝上五井。霜日看雷奔。

越客

遂作三年客。能無一字傳。長安自有月。銀漢不通船。老客甯忘越。春鴻欲度燕。卽看大隄柳。歸思正如煙。

桓溪晚歸

落葉谷風起。山寒白日徂。秋風動寥廓。人語入菰蒲。澗險鳴泉亂。林高晚燒孤。前峯斜照出。昏黑徧栖烏。

送百穀歸姑蘇

到來董子國。歸去闔閩城。世路有吳越。交情無死生。百穀以弔張大司馬至郵風高江氣紫。霜落海潮青。別後遙相憶。

頻更月旦評。

紀事

青天日如赭。亭午一星明。不敢論玄象。私心想太平。

小山偶然作

煩惱世情終不休。欲投空谷轉夷猶。寒苔古石深溪路。種樹人歸樹已秋。

江樓

酒幔風帘十萬家。門前流水是桃花。吳鹽似雪來供饌。越女如雲去浣紗。

雪曉懷西清田舍

松暗泉明澗道崩。洞門寒色掩枯藤。朝來茅屋無行路。雪壓幽厓第幾層。

讀慧上人東嘉草

新詩讀罷意俱閒。煙海蒼茫去不還。應笑桓溪老居士。碧窗終日夢青山。

吳敏道十八首

敏道字日南。寶應人。萬曆中貢生。有觀槿、白雲、折麻、月舫、竹西、水影堂等集。

弇州山人續稿。日南詩辭旨清麗。神采流暢。發端必工。尾結必道隆萬之際。灼然巨擘也。

田按。日南詩清俊灑落。古今體俱入格。選家多未見收。亦珊瑚網之遺珠也。

子夜歌二首

郎向湖南去。昨日纔歸來。東風知儂意。吹動羅幃開。

儂有白頭吟。曲短調自高。雪花綴瓊樹。好看不堅牢。

竹枝詞

妾家紅樓江水邊。樓前日到上江船。問人問得郎消息。郎到家時月正圓。
妾家住在錦江旁。錦江流水入瞿塘。吾儂只愛錦江好。瞿塘風波愁殺郎。

采蓮曲

朝采蓮。暮采蓮。木蘭爲楫沙棠船。翡翠珠簾挂兩邊。青娥皓齒嬌且妍。吹洞簫。擊盤鼓。歌聲未歇雙起舞。
霧縠冰縠風前舉。游龍驚鴻何翮翥。南湖去。北湖回。三十六湖明鏡開。湖水流入杯中來。人生不樂何爲哉。君不見玉繩漸低西月頽。

鷓鴣行

鷓鴣乎。鷓鴣乎。爾形不祥。爾聲胡惡。胡爲乎朝。登柏梁之臺。暮宿平津之閣。巢阿之風。遠避之。青瑣紫微。俱落莫。阜囊彈擊。滿中朝。豈能容爾。鳴曉曉。鷓鴣飛入故山去。浮雲不蔽萬年樹。萬年樹下吹玉簫。還迎鳳凰歸舊巢。

至日楊貢士見訪

煖氣浮葭動。晴雲逗水新。喜逢南至日。得見北來人。笛奏關山月。衣沾京洛塵。梁園行授簡。莫歎馬卿貧。

送濟菴禪師還東嶽

僧來自南海。別去指東峯。破衲兩三片。閒雲千萬重。楓江寒落影。花徑暮留蹤。遂有皈依念。如聞煙際鐘。

夜自范莊回支川作

雲蹤無定在。來往此溪頭。月照袁洪渚。詩成謝朓洲。遠村惟辨樹。淺水不勝舟。煙際重回首。知君尙倚樓。

懷郭次甫

只在江心寺。盈盈不可呼。梅花一歲盡。鴻雁尺書無。春色似相惜。焦山莫太孤。願因新月吐。贈爾摩尼珠。

春日過高郵訪龔憲部

經歲不相見。停雲詩思多。春風來幾日。吹綠五湖波。一舸能乘興。中園堪養疴。娟娟畫省月。光滿碧山蘿。

海陵登望海樓

久客不勝思。哀歌劍忍彈。故人能載酒。天地此憑欄。風笛山城暮。霜旌海戍寒。當筵重慷慨。頻按切雲冠。

秋興

烏鵲棲方穩。鳴雞喚瘦筇。月低穿石樹。風裊渡溪鐘。世事元甘拙。詩情未覺慵。自然眠不得。非是感秋蛩。

黃質山寄詩因答

美人居近館娃宮。采采寒香曲徑通。明月總憐千里共。暮雲眞擬一尊同。吳儂江上丹楓葉。楚客山中青桂叢。玩世興情俱不淺。肯因搖落怨秋風。

宿鐵塔寺無塵上人方丈

濟水瀾瀾繞古寺。下馬先浣塵土容。白雲一片老釋子。青天九級金芙蓉。客久已是厭苦海。睡熟不聞鳴曉鐘。遠遊竹杖化爲鶴。明日留之殿門松。

姑孰

馬上春風繫玉瓶。遠遊正不礙沈冥。故人亦有當塗宰。客子重過姑孰亭。橋影江天搖水碧。塔陰山寺落空青。滿城白紵歌仍好。一樹梨花倚醉聽。

秋日寄武昌故人

別後頻看月。秋來未得書。武昌江上柳。應似故人疏。

夜歸

夜景何蕭寥。川原莽迴互。山僧相送歸。月在西村樹。

俞安期二十六首

安期初名策。字公臨。更名後。改字羨長。吳江人。有《琴瑟集》四十卷。

列朝詩集。羨長巨目。鼻魁。顏長身。狀貌如河北僧。父與之談。盱衡抵掌。意氣勃如也。少客於龍君揚。受國士之遇。君揚被讒。入楚。慰之。遣戍永安。又入豫章。送之。與楚人丁元甫爲意氣之交。元甫歿。厚遇其子。海內歸義焉。羨長嘗以長律一百五十韻。投贈王元美。元美爲之傾倒。已而訪汪伯玉於新安。訪吳明卿於下雒。皆與結社。後門章布。頗依諸公以起名。才氣灑涌。晚亦知厭薄其窳白。而聲調時時闕出。不能自禁也。

靜志居詩話。美長之名。由元美、明卿、伯玉而成。詩亦兼綜三家。原本李獻吉。長於癡祭。賦景有餘。言情不足。如入隋苑觀藕絲花。青紅碧綠。非不爛然奪目。卽而視之。於根株總不相附。

田按。美長才筆縱橫。選聲練格。俱准古人。雖依元美輩以成名。其詩未必盡受羈勒也。明卿、伯玉之才。去美長遠甚。美長安肯俯就。惟貧士依人。不得不稍爲假借。論者乃以此爲嘗議。何所見之不廣也。

同陶懋中使君自樊口赴江夏抵洪山作

晨榜截洪濤。午轍改遙野。墳墟岸善崩。斷續雨頻灑。官道鮮有蕩。山容亦無冶。扶攜徒衆驚。揭厲淫潦瀉。爰愁風篠扶。蛟奔土膚赭。仰脅旣升危。折行屢經下。濁泥辨去蹤。觸雲誤來者。行止附同懷。慰勞愜清罽。夕寐偃頽館。朝餐卽荒社。合并展衾綯。遞代更輿馬。委形故所忘。爲恭諒非假。遠矚情迴復。微吟意宜寫。豈茲旅途艱。而遣歡悵寡。撫物領賞心。超超息蘭若。

楚行詠古二首

得志則皋夔。失時亦龍蛇。胡爲屈大夫。栖栖欲懷沙。發辭吾所師。述意良足嘉。遠擬殷三仁。俯仰多隱差。賈生計大事。實有治安才。所乏葆光德。而令絳灌猜。出傅扼所志。弔屈申微哀。承塵上鵬鳥。憂生亦何哉。

丁南羽畫維摩說法圖贈以長句

維摩昔家毗耶城。說法思爲衆生利。辯才居士稱無雙。了義法門明不二。當年顧長康。每傳其像留雁堂。張繇僧探陸微探效之差可方。復有孫尙子。亦傳行變空門裏。吳子道遜程遜繼之頗相似。瓦棺甘露壁俱毀。定水聖

慈復崩圯。靈光飛散。成雲煙。粉彩沈淪。入泥滓。更兼祕本久不傳。丁生創出遙齊肩。神手疑懸造化力。慧眼應破天人權。越嶲空青武昌綠。齊宮執素吳江穀。毫端現界忽三千。色裏看身還丈六。諸天旣雜沓。萬國何繽紛。天女天花散若雨。龍神龍部歸如雲。問難文殊若賓主。仙音似共迦陵吐。隱几真看示病容。彌天偏入莊嚴土。人人諦聽繞縈迂。法力變現成須臾。室中坐乞燈王座。鉢裏食傳香積廚。嘗聞爲此畫。每向中天晷。幾年工巧殫神明。一時瞻禮生歡喜。應知盡力施丹青。只欲邀人出生死。俞居士。丁畫師。前身同住香海水。偶然並出青蓮池。只今宛在阿閼國。神通遊戲相追隨。

白嶽贈別慧月天人歌

高高白嶽神僊廬。紫庭綠宇開帝居。萬峯合沓擁珠闕。白靈趨走朝琅輿。琅輿珠闕光相射。有美翩翩聿來下。天人瞥見行天門。羽士爭看迎羽駕。曳玄服。飄華巾。步丹宮。謁絳辰。誰信毗城散花女。只疑帝所彈璫人。自言身是謫居者。家臨大道通車馬。羞廁東園桃李間。肯赴西陵松柏下。花間樹下虛可憐。春來秋去能幾年。任是學歌兼學舞。爭如事佛還事仙。故衣拋卻黃金縷。稽首皈依梵王土。江上曾投曼室師。閑中曾禮香嚴主。今來問道陟名山。寶函玉檢探雲關。詎隨鳳史吹簫去。也乞浮邱授藥還。聽者何紛紜。望之俱歎息。遽絕上宮要。旋整東歸軾。歸時應報女伴知。從今勿復忌蛾眉。謫期暫在桃葉渡。化身終去蓮花池。舊事繁華總堪悔。滄桑旦夕頻遷改。石城女子甯久留。臨春美人復安在。卽遣豔曲傳人間。何似幻

身辭苦海

沉江雜述

甕子空胎入。舟師徙岸過。牽江人力盡。栽石鬼工多。風氣非全古。華音已半訛。向西聞小梗。羣盜尙橫戈。

計辰州光父同登郡齋後山卽事爲贈

吾愛辰陽守。看雲獨遠心。人長放衙去。山與閉門尋。磧石空階伏。廚煙一壑深。誰能郡齋裏。日夕臥青林。

澧上逢林元琳止宿因託寄聲龍君超

天地行寥廓。哀歌亦自勞。思投武陵住。直作枉山逃。石鼎青精餌。槽牀玉乳醪。誰家留醉客。千日臥蓬蒿。

雪後寄王仲房

積雪山城霽。長煙旅望開。君家隔蒼莽。我馬病崔嵬。茶事鋤雲罷。漁歌出浦來。桃花東郭酒。春事候登臺。

宿雙嶺菴

聖水臨階定。祇林截嶺開。雨冰龍子出。嘯月虎俚來。喻法高移座。繙經小築臺。梵音中夜發。誤作海潮迴。

龔子勤自嘉興守擢參浙省駐節金嚴奉寄

部內江山是奧區。定搜遺事歷崎嶇。雲林叱石逢僊客。星瀨披裘問釣徒。大有土風書越絕。能無歌詠憶吳歛。故鄉寥落扁舟客。浩蕩鷗羣在五湖。

吳姬年十五爲馮元敏賦贈內人

吳姬十五嫁前谿。樂府翻成手自題。持檝揚歌津吏女。上堂挾瑟侍中妻。花藏寢室流蘇暗。山擁粧樓翠黛齊。每起校書臨鏡早。催人不恨汝南雞。

聞周國雍以順慶守擢建昌兵備進平西南夷遙寄二首

總爲征蠻事武功。翻從化蜀借文翁。深浮黑水蒲江盡。懸度青天犍道通。笮馬全教歸漠北。竹王那許擅南中。乘邊更欲開新郡。露布先飛入漢宮。

渡瀘無復瘴紛紛。詞藻長飛五色雲。帳下新聲橫吹笛。馬前雕管檄蠻文。搜荒暫借青羌卒。清壁深移赤甲軍。自分書生疏劍術。卻思長揖遠隨君。

寄周國雍使君於蜀郡

嘉陵新領虎符年。循吏西來事已傳。神雀郡門長自下。石犀江岸老仍眠。天橫雲漢孤城上。山擁岷嶓臥關前。不藉王褒供筆札。中和輸爾賦新篇。

塞上四首寄汪司馬伯玉先生

塞垣高築切雲霓。烽燧驚聞斥堠迷。未遣漢師犁漠北。浪招虜騎牧關西。三秦士女移旂帳。百二河山入鼓鞮。更說洮州損諸將。可容無罪問羌氐。

佛牙每說迎西域。虜道長聞借肅州。誰遣單于通右臂。遂煩飛將射旄頭。六師塞外難憑險。五郡河西獨
隱憂。縱馬放牛非往日。居延龍勒早防秋。
夜傳毳幕寇西涼。朝輦金繒委朔方。既有羣胡看太白。甯勞諸市貢飛黃。江南輓粟輸垂盡。塞上屯田事
太荒。今日乘邊休浪議。安危須問趙平羌。
先皇套賊未曾搜。竊土犁田古夏州。千帳依憑元內地。幾人憂患自西郵。虛誇積甲齊熊耳。誰議稱兵飲
虜頭。會牧昨聞通外援。可堪肘腋據旃裘。

玉照亭

鳴曲孤亭抱影斜。林梅迴繞玉光華。巡檐近擁三珠樹。捲幔高懸四照花。肯學漢粧非主第。不教羌笛在
鄰家。玲瓏帶雪仍堪鑿。宛坐雲中七寶車。

寄周國雍憲長於臨洮

榆城絕域畫蒼茫。白日陰陰隔隴長。雪後旌麾秋逐虜。雲中燈火夜搜荒。桃花東道來天馬。木葉西山見
玉狼。不耐因君懷出塞。笛中新曲奏伊涼。

李善徵憲使備兵湖北賦贈

荒雲夷部拓千山。版籍新開洞壑間。土俗已非三戶楚。衣冠漸出五溪蠻。塚邊樹色巴蛇斷。廡裏桃花笮

馬閒獨有犁庭西北議。無人重出玉門關。

登夕佳樓因寄丁元父兄

縹緲飛樓載酒過。異鄉搔首一悲歌。高沙北郭情偏近。佳氣西山夕更多。濫有虛名歸草莽。動隨詩興隔關河。美人南浦遙相憶。獨雁春江怨綠波。

勞勞亭與所知敘別

長河落廣庭。酌酒溼秋星。出戶輕生死。藏名託醉醒。一言曾夙昔。百感豈飄零。朋好從茲別。山川信所經。亂雲高進屐。大澤莽揚舲。巖石臨圻白。湍流入峽青。懷沙悲楚客。倚竹見湘靈。風土還徵記。鄉音欲改聽。清芬紉岸芷。赤實采江萍。畏路元輕犯。遙心不自甯。懷親愁日短。憶友悵雲停。縱使身仍在。勞勞似此亭。

水月洞

洞戶引江流。南下清瀾瀾。月過影孤沈。潛蚪抱珠起。

東濠雜興

日斲青精炊飯。雨芟綠草編蓑。老合爲農石戶。貧甯貸粟監河。

代送中使織袞還朝

織罷冰綃進御歸。鮫人水國暫停機。自憐不及吳蠶老。一吐新絲上袞衣。

明詩紀事卷二十六

庚籤

柳應芳五首

應芳字陳父海門人有柳陳父集四卷

露書柳陳父詩如田舍翁暴作封君舉止生澀

列朝詩集陳父僑居金陵住城南之杏花村近瓦官寺舊京最僻地也爲人和雅美鬚髯修容止衡門兩版非力不食往還惟曹能始林茂之三四人他無所詣作詩不輕出語每行街市低頭沈吟悠悠忽忽觸人肩面不自覺也嘗語人作一律詩必還魂數十番方得意愜其矜慎如此廣陵詩人有盛名推陸無從沿染七子流風不克自拔陳父名不及之篇什亦寡與會清發翦刻常言自可使無從卻步此論實自余發之白下談詩者無異議焉

書影陳父無子一女適程君慎先于歸日以所刻詩板爲奩具時謂愈于昔人繫羊牽犬也

田按陳父詩細膩清切牧齋稱其矜慎有以也

別車福州

孤舟將北渡轉轉切歸心衣積他鄉淚琴操故土音山長催日暮江暗結秋陰回首閩南路思君一水深
題陳蓋卿溪上居

晚歲家溪上。蕭然林下風。栖雲山向夕。寫月水承空。岸折長橋落。城臨小市通。看君忘出處。將老一邱中。

正月十七夜宴李太保西第

正元望後宴平津。羅綺初筵入早春。盤馬鬪車纔罷夜。殘燈剩月尙宜人。梅花落到歌前緩。柳葉開經勝裏新。不信金吾仍放禁。歸時看取六街塵。

豫章朱芾斯宗侯逸園雨中宴別屠太初之南海羅敬叔之武昌李林宗之白下孫泰符之劔江歐陽于奇之毘陵子還廣陵

滿堂遊子歎飄蓬。無數離羣細雨中。飛蓋西園因卜夜。挂帆南浦待分風。豈知江海經年別。不見關山去路同。他日相思非一水。尺書何處寄春鴻。

咏美人梅花對鏡

香奩妝欲罷。移照梅花前。徘徊兩孤影。抵死鏡中憐。

何白三首

白字无咎永嘉人有汲古堂集

列朝詩集无咎幼時爲郡小史龍君御爲郡司理異其才爲加冠集諸名士賦詩以醺之爲延譽於海內遂有盛名能書善畫畫史會要无咎詞賦擅名山水得方方壺筆意清老可尙竹石亦最煙潤

靜志居詩話。汲古堂集。原亦出於七子。頗與俞養長相近。

哀江頭

飛雲渡口西風急。津吏停橈刺船立。始陽公子方垂髻。掩抑依依向余泣。爲言阿父守南康。雙旌五馬爛生光。甯知廉吏反成罪。諸孤藐爾身淒涼。父昔驅車到公府。蒿目日詢民疾苦。化行遠邇期月間。不圖遽坐中官禍。中官權稅來江州。譏征會歛深誅求。大旗卓天天爲愁。峨艦壓江江不流。長江日高一丈五。傳呼奏樂頻搥鼓。于闐寶帶刻麒麟。大內金牌畫飛虎。秃袖監奴紫繡衣。銳頭惡少青絲組。長官俛首不敢言。何況區區商與賈。左右濫用水衡錢。夜椎肥牛朝擊鮮。張弓挾彈仰天射。烏飛不近潯陽天。游徼關頭弛巡邏。忽傳商客偷關過。駕風遠逐到南康。中流繹斷官船破。十人失水九人墮。飛濤適值長鯨餓。水中叫援呼州民。州民舉酒翻相賀。貂璫見說生狂嘖。自謂奉書督國課。璽書統轄及守臣。有事守臣當我佐。州民袖手誰使然。民之凶獷誰之故。父謂爾璫勿怒嘖。爾曹腰領無容剉。關津有地稅有經。越境猶然贖泉貨。而曹之死天死之。豈得吾民有連坐。貂璫搥牀怒不止。謗牘蜚誣抗明旨。御批緹騎出燕京。檻車夜達南康城。南康城外達城內。江水湯湯流哭聲。母憐此別異南北。誓願相隨同死生。父云一身尙難保。豈能攜汝增伶俜。夜闌掩泣已憔悴。阿父據牀方假寐。燭輝無燄雨涔涔。阿母遂作無聊計。平明呼母唯空牀。甯知阿母懸高梁。阿父見母死。技血裂中腸。兒女見母死。恨不從母亡。闔城聞母死。擗踊咸如狂。中有

但夫人八十鬢髮霜。開我東閣廂。著我素羅裳。倉皇備牲體。命僕舁黃腸。親爲視殮含。三繞母尸傍。抗聲慟爲絕。陰霾四塞天無光。錦衣敦迫難久俟。薄俸那能具行李。父老吞聲爲醮金。商略通衢眞方軌。三日得環三百餘。空城大小隨行車。呼天遠徹一千里。道傍聞者咸嗟吁。天王明聖臣當戮。詔發秋曹先繫獄。一物終回造化仁。六幽竟藉陽光燭。不分生還見故鄉。驚看兒女錯成行。短衫紫鳳半零落。小子呼爺能遶床。夜闌秉燭獨疑夢。悲喜交并轉沈痛。幾回呼母母不聞。嘔血撫棺惟一慟。孤臣九死輕一毛。天心未寤生何聊。愁聞稅監益驕恣。豺狼滿道人蕭條。

橫雲山人史稿吳寶秀字汝珍浙江平陽人萬歷十七年進士二十六年爲南康知府湖口稅監李道橫甚寶秀不與通會漕舟南還乘北風揚帆直入湖口道欲權其貨遣卒急迫之舟覆有死者道卽遣爪牙吏持牒捕漕卒寶秀拒不發道大怒明年正月飛章劾寶秀及星子知縣吳一元青山巡檢程資阻撓稅務詔俱逮治給事中楊應文等請下撫按公勘大學士沈一貫吏部尙書李戴國子監祭酒方從哲等交章爲言俱不報寶秀妻陳氏慟哭偕行寶秀不可乃括餘貲及警環得銀三兩許付其妾曰夫子行以爲路費夜自經死寶秀至京下詔獄大學士趙志舉上言臣困臥牀褥間聞中外人情洶洶皆爲曠稅一事聞寶秀逮繫時其妻投環自盡闔郡號呼幾成變亂事關民生向背宗社安危臣不敢以將去之身隱默而不言星子民陳英者方廬墓約儒士熊應鳳等走京師伏闕訟冤乞以身代於是撫按及南北諸臣論救者疏十餘上帝皆不省一日司禮田義彙諸疏進御前帝怒擲之地義從容拾起復進之叩首曰闕臣跪候朝門外不奉處分不敢退帝怒稍平取閱闕臣疏命移獄刑部皇太后亦聞陳氏之死從容爲帝言至九月與一元等並釋爲民歸家踰年卒初南康士民建祠特祀陳氏後改建合寶秀祀之天啟初贈太僕少卿賜祭錄其一子

溪翁行

溪田犂确河田沃。瘦土民勞沃土樂。河田多收十斛餘。年年不肯全輸租。溪田收薄少生計。刈薪賣穀完新稅。春來月出不聞歌。昨朝社飲無人醉。溪翁相羨河田豐。家家甕酒珍珠紅。

淮陽歸興

窮秋征馬出扶桑。五夜流烏入建章。土木再煩將作匠。詔書頻拜羽林郎。山連豐沛今湯邑。江繞濡須古戰場。安得漢庭長孺輩。令渠一臥治淮陽。

林世璧一首

世璧字天瑞。閩人。參議炫子。有彤雲集。

靜志居詩話。天瑞爲龔祭酒用卿女壻。嘗從婦翁游鼓山。分韻賦詩。時天瑞已醉。詩成題壁。有眼中滄海小。衣上白雲多之句。坐客皆歎以爲不及。徐惟和詩云。聞尋老衲叩禪堂。墨跡淋漓滿上方。一自題詩人去後。白雲滄海兩茫茫。蓋爲天瑞作也。覽彤雲集終卷。才雖敏而調實庸。

詠燭

弄影還驚月。開花不待春。夜深屏幃裏。偏照綺羅人。

斯一緒二首

一緒字惟武。東陽人有懷白山房稿。

藝書一緒詩格精使事。後忽悟一切去之。興寄超然。

金華詩錄。萬歷戊午。惟武與徐伯陽、龔秀良、陳大孚、章無逸、吳賜如諸人爲八詠樓社。惟武實爲盟長。

塞下曲

草別故園綠。路經窮戍寒。天山從此雪。萬里正漫漫。帶甲宵難夢。聞笳曉未殮。裁衣休准舊。俠骨半銷殘。

浣紗石

人去邨銷采葛歌。浣紗溪畔憶流波。越臺吳苑俱荒草。春色依然到苧蘿。

方堯治一首

堯治字翁恬。蘭谿人。處士太古孫。

多雨

荆楚原多雨。蕭蕭五月秋。支床無好夢。覽鏡有深愁。性已同麋鹿。名應混馬牛。避人長散髮。吾道屬滄洲。

商家梅一首

家梅字孟和。閩人有種雪園詩選五卷。

隱秀軒集。孟和稱詩二十年。取材多用物宏。假途遠。富有日新。

列朝詩集。孟和少爲詩。饒有才調。已而從鍾伯敬遊。一變爲幽閒蕭寂。不多讀書。亦不事汲古。鑑心役腎。取給腹笥。低眉俯躬。

目笑手語，坐而書空，睡而夢語，呻吟咳嗽，無往非詩。殆古之詩人所謂苦吟者也。
田按：閩人之傾心鍾譚者，前有蔡敬夫，後有商孟和。孟和詩較有情致。

到白門同友夏坐茂之齋頭話別

暫得清談到夜分，逢遲別促思紛紛。庭前一片高梧影，明月來時卽似君。

王醇三首

醇字先民揚州人

列朝詩集先民弱冠善詞賦，陸無從，李本甯交相引重，意不屑也。遊長安日，醉市樓，挾妓走馬，人求識面不可得。會麻大將軍，閔將士，先民輕裘快馬，馳突演武場，引弓破的，矢矢相屬，擊雙劍飛舞，霎忽如崩雪。大將軍降階執手，欲舉以冠一軍。先民笑曰：「家本諸生，聊用遊戲耳。」讀其集，深情孤詣，秀句錯出。
田按：先民五律頗近鍾譚，古詩時能穎出。

題馬姬湘蘭所畫蘭竹卷

寒映秋芳數枝玉，冰綃宛是湘江曲。能使湘靈愴別魂，瑤瑟泠泠怨秋綠。霓裳奔月留難住，錦衾紅燭生愁緒。墨花化作秦淮雲，猶向粧臺日來去。

吳門送劉元博遊楚

芹芽淺淺江綠深，江南畫船載楚心。因君余夢瓜州渡，期君水宿夢相遇。梁間敝笱江底魚，三年意密見

面疏寫與苦歌伴千里。峽夜唳猿疑在紙。

贈林羽仲

業廢歸無定。年衰見屢難。詩名半生過。客舍幾移安。少已深邊策。貧聊就幕官。西風翦江郭。猶有故人寒。

薛岡二首

岡字千仞。鄞人有天爵堂集。

甬上書舊集千仞年八十集其生平元旦除夕詩爲一卷起萬歷庚辰至崇禎庚辰福建林茂之敘之身爲詞客六十年名重天下亦盛事也。

庚辰元旦

日挂鳳樓端。新年事改觀。可矜臣罪薄。不測主恩寬。望赦心徒費。回天責已完。諸公有笑口。踴躍試辛盤。

華清宮

繡嶺出煙村。宸遊迹尙存。離宮何處是。流水至今溫。輦路年深廢。峯巒幸後尊。空餘一片月。猶似照朱門。

吳夢陽一首

夢陽字允兆。歸安人有射堂詩鈔十四卷。

列朝詩集允兆好吟詩。詩不就。竟夜不交睫。苦思刻鏤。必得當而後已。

靜志居詩話。牧齋列朝詩論嘉定程孟陽曰。松圓詩老謂能照見古人心髓。若親炙古人而得其指授。歎爲古未有。新安閔景

賢輯明布衣詩。推歸安吳允兆爲中興布衣之冠。是皆阿其所好。不顧千秋之公。非以余觀二子之作。以政則魯衛。以風則曹檜。陳詩者不廢斯幸矣。

田按。允兆詩誠如竹垞所譏。孟陽清俊之作。集中不知凡幾。竹垞與允兆同譏。斯所謂良驥與駑駘同阜。公是公非安在也。

湖上同晉叔嘿孫作

心賞無過杯酒間。良朋難合復追攀。重尋往事渾如夢。好藉清談一解顏。秋杪細聽將墮葉。月斜猶傍未沈山。請看臨別蕭蕭影。幾度殘鐘拂曙還。

米雲卿二首

雲卿字君夢。湖廣人。或云汴人。徙家蘭溪。後徙居歸安之埭山。

筆精。君夢有山居詩。極幽人之致。

列朝詩集。君夢少有才名。薄遊南北。落落不遇。其撥悶詩云。十年湖上社。雙屐柳東山。有子癡難教。無家老不還。亦可見其老懷也。

田按。孫太初秦人。或云蜀人。米君夢楚人。或云汴人。遷家莫得其詳也。據黃居中增筆精云。君夢在南中贈其二律。是嘗身與唱酬者。居中云。君夢生於汴。徙於婺。卒於茗。當可據。君夢有詩云。歸心長路阻黃河。亦可爲汴人之證。

楊柳歌送唐仲秩

江南二月時。楊柳綠華滋。高臺不知數。臺邊千萬樹。綦隄夾岸相映新。搖曳朱門翳美人。翠樓絲絲爭媚

日黃鸝樹樹學。嗚春不住高。下飛金梭亂。擲流黃機。又如織女織。初斷千絲萬。絲紛歷亂。旋作東郊一片陰。雨中淺淺煙中深。迤邐青綃合步障。纏綿縷帶結同心。青綃步障大道傍。同心縷帶春風香。佳人玉笛青樓遠。公子金羈白日長。旗亭百座空中曉。嫩葉柔枝互繚繞。碧玉蛾眉怎鬪妍。小蠻腰肢徒裊裊。君不見楚王宮裏花盈盈。千容萬態學未成。春心不死怨猶在。只今盡逐東風生。灞陵橋。章臺路。異代風流那得顧。章臺舊日花如雪。灞陵古來多送別。眼前景物不得將。何以贈君天一方。好向枝頭惜顏色。莫待傷心秋草黃。

春日途中口號

行役日復日。奈何歧路長。春泥滑馬足。芳草斷人腸。日落野煙合。花開村店香。吳姬似相識。招客酒壚傍。

秦鎬一首

鎬字京。汝南人。有頭責齋詩。

靜志居詩話。袁小修序頭責齋詩。有云。今人字皆兩字。而京字獨一字。自東漢以下無之矣。然漢以降。如顏之推字介。李曇字雲。劉乾字天。羅靖字禮。房玄齡字喬。顏師古字籀。張巡字巡。孫晟字鳳。李暉。徐倫字堅。毛欽字傑。正難悉數也。

冬夜見新月

霜天約略一鈎斜。半挂平蕪半遠沙。照向兩鄉偏是缺。不知圓處落誰家。

石沉一首

沈字澹仲如皋人有白雲居士集二卷

列朝詩集澹仲爲詩陶冶性情蕭疏閒放雅以寒山擊壤自命吾則以爲古之香山今之江門也

有懷

遠村幽壑獨徘徊。雲護柴扉雪護苔。盡日溪邊倚枯柳。白鷗何事不飛來。

周應辰一首

應辰字斗文鄞人有綠莊詩采

田按斗文師余君房君房別號農丈人斗文自謂生平苦學得農丈人之半自號農半其詩亦襲君房之體

下第後送薛元璞

忽忽不得意。秋風又送君。路知雙目近。情作一年分。人影留殘照。山光隔片雲。歸期如可俟。此去莫論文。

戎玠一首

玠字孟常鄞人有蜀游草

曲溪

村煙生晚翠。野水聚空潭。雞犬逢人倨。桑麻著雨甘。漁歸燈破暝。僧定衲棲嵐。得近前溪泊。泉聲答夜談。

虞伯龍一首

伯龍字公善鄞人有擔簦集

昭代選屠公善佳句骨以耽詩瘦情因縱酒狂薄俗無青眼長才自白眉

明妃曲

生小入建章垂死埋沙漠不怨主恩輕還悲妾命薄

張正蒙一首

正蒙字子明江甯人有蓬蒿集

列朝詩集子明世居通濟門外之覺灣臨河結廬柴門晝閉帶索拾穞未嘗俯仰於人年踰九十隱淪終老

冬日閒居

僻居心遠矣閉戶日蕭然一水帶寒月孤村暮夕煙貧惟尊酒在詩豈衆人傳卻憶蒙莊子冥搜內外篇

程伯陽一首

伯陽字師道休甯人有小樵山人集

新都秀運集師道家貧賣藥自給詩多漫興而沈思者自入法

白岳雪中送惠光上人還福田

山中一夜雪一尺。山鳥無聲斷人迹。石楠倒挂天門開。飛磴虬盤樹杪來。怪爾老僧不暫住。凍雪千峯獨歸去。寒風吹衲踏瓊瑤。肩上蕭然只一瓢。紫霄巖前一相送。鐵杖敲殘松鶴夢。重來結社是何年。澗上桃花紅又燃。

孫友篋一首

友篋字伯諧歙人。

新都秀運集。伯諧好神仙。山居獨行。洞籙在佩。不顧俗諺。飄然自怡。其詩任性放吟。嫻於祖述。間有合作。便越凡情。若行看水流去。坐期雲飛還。我家老梅花。開到第幾樹。行人欲問前朝事。翁仲無言對夕陽。皆稱佳句。

過程學士墓

野水空山拜墓堂。松風溼翠洒衣裳。行人欲問前朝事。翁仲無言對夕陽。

孫名由一首

名由初名凡。字公路。蘇州嘉定人。有張公路詩集。

靜志居詩話。公路居平世而好習兵。塞家產僮僕以避徭役。可稱知幾之士。蓋先唐。裴程。李四子稱詩。而學文於震川者。

夏日田家

風過林花落。雨餘溪水渾。飛雲停不去。低回戀幽軒。夕陽下平楚。遠樹見漁村。四體弗勤動。興言愧鹿門。

應臬二首

臬字仲鵠。鄞縣諸生。有楚遊、烏溪詩草。

甬上耆舊集。何无咎云。仲鵠詩。如波面淪漣。青壁映帶。

閉戶

閉戶松鱗老。臨渠竹粉香。偶然來野衲。小語及空王。日永修茶具。年衰訂睡方。窮山渾自了。焉敢傲羲皇。

姚少師影堂

有自題
偽語

冀北江南事已非。禪機未了說戎機。止聞智者師黃石。曾見功臣著衲衣。杉翠溼空春欲老。砌塵凝席客來稀。一參偈語低徊久。颯颯靈風動素幃。

何璧一首

璧字玉長。福清人。

靜志居詩話。玉長任俠。見知於黃陂張濤。張後開府遼東。將疏薦以布衣拜大將。會罷鎮乃止。濤卒。入楚哭之。遂以病死。亦矜奇之士也。寄友詩云。士到出山誰不賤。術惟游世最難工。足當阮生之泣矣。

金陵寄沈千秋

挾策干時任轉蓬。壯夫曾悔學雕蟲。荒年有客愁炊桂。薄俗何人惜爨桐。士到出山誰不賤。術惟游世最

難工長安官道原如髮。只有狂生歎路窮。

汪樞一首

樞字伯機。鄞人。有存俟篇。

甬上耆舊集。伯機蕭散工詩。治別業曰泡園。作園居詩六十首。徐與公題其卷曰。疏作風清。逸同雲上。田按。伯機早春詩云。貧家無歲事。贏得看梅花。可謂清絕。

一邱

頭白令身閒。行隨倦鳥還。春生栽荒地。水漫釣魚灣。列竹通遙澗。刪松露小山。一邱高臥穩。無夢落人間。

諸葛鯨一首

鯨字君騰。一字騰甫。蘭溪人。寄籍西陽。宣撫司爲諸生。貢入太學。有漫遊雜稿。黔中集。問華子集。

四溟詩話。諸葛騰甫。渝城人。日東李給事。前聯詞意並佳。天造奇景。宛如披四川圖。使人興不可遏。但神馳於夢寐耳。其詩附後。訪舊來何晚。輕帆落驛亭。江迴劍外白。山擁漢中青。萬里逢人日。孤城感客星。知君懷諫草。翹首望明廷。騰甫別號問華。諸葛武侯四十二代孫。

小莊卽事

春樹縱橫繞白沙。清溪流出幾人家。自嫌睡起渾無事。且向空庭掃落花。

盛鳴世三首

明詩紀事 庚籤 卷二十六

鳴世字太古。鳳陽人。國子監生。有谷中集三卷。

列朝詩集太古詩。翦刻鮮淨。措置清穩。盡削常調。實爲一時之雋。如烏嘯白門夜。月上一樓霜。錢郎復生。何以過此。

靜志居詩話太古五言。圓潤貼妥。其源出於耶士元。

送臨江蘇太守

五馬夾朱輪。驛途不動塵。問山廬嶽近。領郡虎符新。吏宥詩難廢。民稀俗易淳。江花迎路發。十月待行春。
夜過凌方弦山齋

十里到孤村。柴門下夕曛。霜鋪平野月。鍾斷隔溪雲。病骨逢秋健。清言忘夜分。自君多祕術。猿鶴已成羣。
贈曹鳳岡

姚旅二首
仙才多玩世。況復幕官閒。鶴養空庭樹。雲栖傍閣山。酒干官長禁。詩乞野人刪。爲有延徐榻。相期數往還。

旅初名鼎梅。字園客。莆田人。

露書作詩須有警語。未經人道。方能傳達。若拾人牙後。已披之華。何足奪目。余有元日江行詩。春聲得野雀。歸意競江鴻。不道芳年改。還添衰鬢中。自謂無所蹈襲矣。然唐太宗首春詩。寒隨窮律變。春逐鳥聲開。劉長卿元日詩。律變滄江外。年加白髮中。則余向作。總不出古人範圍矣。安得佳。

列朝詩集園客苦吟詩不多作。

靜志居詩話。園客放浪湖海。綴拾舊文。露書一編。頗存軼事。其評覽一時詩家。遠比敖器之。近續王元美。

瑯琊道上

魯酒猶堪醉。瑯琊奈可栖。荒村花不笑。殘日樹含淒。城郭黃沙外。人家古墓西。唯餘霜月夜。烏似白門啼。

辟支巖

選勝藤蘿更上攀。龕岩一點翠微間。江城作斗蹲平地。海水如雲貼遠山。茶竈堪消今日福。酒杯仍值野僧閒。同遊幽僻同猿鳥。不到昏鐘不肯還。

李竣一首

竣字公起鄞人有盟鷗集

甬上耆舊集。公起生卽雙。父喪號慟五日夜。水漿不入口。咽枯而嘶。乃更啞。縱觀先世遺書。不問寒暑。性好客。郵筒走天下。四方學士大夫樂趨之。具賓主以察。相通以筆。有問奇者。載紙以往。輯里中記載。名甬東軼事。撰述甚多。舍傍有斐園。竹波軒。青蘿閣。諸勝。與客遊處。好學之外。淡然他無所嗜。翻若口耳爲煩也。曹能始嘗合華亭唐仲言爲二異人傳。仲言贊而工詩。通古今。公起以目誦。仲言以耳讀。兩君誠千載異人也。

寄曹能始少參

聞道浮山勝。水松十二株。華堂背北郭。曲榭瞰西湖。閒蒔三山藥。高懸五嶽圖。金屏花外擁。小小侍呼盧。

董小雙李小蘇
俱閩中名妓。

唐汝詢二首

汝詢字仲言松江華亭人有編蓬集十卷後集十五卷

列朝詩集仲言五歲而贅父兄抱膝上授以三百篇及唐詩無不成誦旁通經史能爲諸體詩箋注唐詩援據賅博亦近代一異人也嘗過余山中酒間誦子虛上林諸賦杜白諸長篇鏘金戛玉琅琅不遺一字留校杜詩時有新義如解溝壑疏放之句云出於向秀賦稽志遠而疏呂心放而曠亦前人所未及也仲言之兄汝譔篤嗜王李之學仲言童而習之故其於詩未能超詣蓋亦雲間流派如此

靜志居詩話詩人形累者孫伯融跛偶武孟張節之謝茂秦眇視希哲枝指何仲默禿筭其他不可悉數至唐仲言無目李公起啞耳聾兩君乃能勤於筆述不廢吟咏是難能也

八月二六日攜諸兒過吳逸一山齋夜集

田禾滿野正高秋命楫將雛偶出遊逸興不緣微雨盡晤言偏愛小亭幽垂垂菊蕊黃將拆颯颯楓林絳欲浮暫一持螯便歸去重陽猶苦獨登樓

折楊柳

昔攀垂柳唱陽關柳復垂絲君未還惟有楊花易飄蕩隨風吹得到陰山

邢大道三首

大道字性之洪洞人諸生自號少鶴山人有白雲巢集二十四卷

田按曹能始合李峻唐汝詢爲二異人傳峻聲汝詢瞽二人皆能詩也少鶴山人邢性之痴癡丈人也張五鹿稱其首與几齊足不及地客見之胡盧而笑顧亦能詩以山人邀遊王侯公卿間余錄其詩可增爲三異人矣

三月八日重遊廣勝寺

野水村橋路不迷十年幾度到招提依巖鶴宿松長好隔岸鶯鳴柳半齊林草自香充佛供塔雲無恙護禪棲東風不負山靈約歲歲何妨到杖藜

送雷廣文擢長沙別駕之任

別駕榮名綰綬年河梁話別轉悽然官程莫惜長沙遠宣室甯忘賈誼賢凭案夏雲高嶽麓褰帷秋色滿湘川懸知公暇延詞客郢上何人白雪篇

寓彌勒菴

客到長安不上書蕭條行李寄僧居經翻石閣香銷後句就松門鶴下初帝里風煙秋色暮天涯霜雪夢魂虛竹床蒲椅聊棲息歸去青山有故廬

王嗣經一首

嗣經字曰常本姓璩上饒人

臺城懷古

湖山迤邐接亭皋。前代遺踪有石壕。腸斷覆舟山下路。年年春草似青袍。

王伯稠二首

伯稠字世周。崑山人。有白虹集二十卷。

弇州山人續稿。世周樂府。尤長情事。歌行奇逸。七言律絕瀟灑。

王奉常集。世周詩。淡宕豪逸。

追昔感事二首

欲醉胡姬耐笑看。鮑酥千盞不辭乾。忽雷抱向青樓月。撥出涼州夜雪寒。
射虎屠龍意氣豪。縱橫年少見吾曹。老來夢斷長安事。落日撈蝦傍小潮。

鍾恠二首

恠初名恬。字叔靜。竟陵諸生。僉事惺弟。有半蔬園集。

香祖筆記。叔靜詩。絕有風骨。不肯染竟陵習氣。古詩如大將鏖自貴。少小爲奴隸。男兒不殺賊。不應死邊城。近體如桐新春後葉。竹正午時陰。皆佳境。

田按。叔靜詩。不離竟陵氣習。阮亭所述。蓋其一體耳。

贈林茂之

不惜頻將過。交情病裏深。桐新春盡葉。竹正午時陰。筆墨延余坐。冰霜識子心。支床憐弱骨。藥餌互相欽。

初秋在聖修中孚齋中

新秋十日易爲涼。風遍閒樓只一床。階疊蘚文綠集雨。菊存花事待重陽。話深兄弟相需夜。機息禽魚各有鄉。遠水長隄疏密柳。鐘聲落處見蒼茫。

葉之芳三首

之芳字茂長。無錫人。有雪樵集。

弇州山人續稿。雪樵子詩。氣完。是以句工而不累篇。調諧。是以篇工而不累格。

列朝詩集。茂長以能詩出遊人間。好使酒罵坐。鄒彥吉與之同里。繆相延重。而心殊苦之。知其人亦豪士也。

虛籟堂

嗒然子綦臥。心與靈區忘。不知寥廓中。清籟如笙簧。耳之忽無聲。下見澄潭光。

迴梁

青陂迴復直。朱梁曲帶斜。波底見人影。藻間明日華。藤花夾岸落。風吹上別槎。

花津

谷口流鶯亭午聞。春深潭上氣氤氳。武陵仙路尋難入。千樹桃花萬疊雲。

田按。虛籟堂。迴梁。花津。乃安茂卿西林三十二景之三景也。西林擅林沼之勝。王弇州有記。

游及遠三首

及遠字元封莆田人有小竹林草。

露書余從子巽卿卒於秣陵游元封哭以詩有九原有路君先到酒伴詩朋次第來之句蔡君蒙戲之云君兩人皆高陽酒徒君當先去次年元封下世詩竟成讖。

蘭陔詩話元封爲益藩上客與同里姚園客吳元翰黃元翰皆預金陵詩社。

再別雯南養正宗侯

祖帳重爲別河橋春欲殘垂楊依岸綠暮雨過江寒老客飄零慣危途去住難多君能解劍拂拭帶霜看

去妾贈夫

賤妾出門去含悲當告誰落花難上樹逝水無還期燈盡催機杼香銷戀總幃可言君意變自歎妾容衰

殘燈

夜漏斷還續燈花開且落應識含羞容滅光進羅幕

沈野一首

野字從先吳人有臥雪閉戶燃枝榕城諸集

列朝詩集從先爲人孤癖寡合下簾賣藥雖甚飢寒人不得而衣食之也曹能始見其詩激賞之延致石倉園題其所居之室曰吳客軒好飲每夜半大呼索酒矜重其詩徘徊吟賞自能始徐興公兄弟外不輕示一人能始常嘲之曰半夜號咷常索酒

一生蠶穉自圈詩，亦可想其風致也。

寒食

驚心芳草上河橋，雨後推窗見柳條。
廚下從來煙火少，不知寒食是今朝。

露書姑蘇沈野作寒食詩，徐燾賞其語，往訪之。及近閩門，重門已閉，進退不得，因於簷下坐一夜，沈因是得名。

王野一首

野，字太古，歙人，有覺非齋詩，饜餘稿。

列朝詩集：太古遊于金陵，不輕謁人，貴人慕其名，訪之累數刺，始一報謁，塞驢造門，稱布衣王野，投刺徑去。晚年詩頗爲竟陵熏染，竟陵極稱之，爲評騭以行世。

金城禪院

林巒殘雪霽，淨土獨游頻。
鳥似忘機客，山疑入定僧。
靈花飄不盡，古木自無春。
坐悟衣珠在，空經累劫貧。

汪禮約三首

禮約，字長文，一字士垓，鄞人，有長文遺詩一卷，四明游籍一卷。

甬上耆舊集：長文中年謝客，坐臥一小樓，著書，雖妻子不得見。垂二十年，少工書，樓上偏置靜楮，於左偏開一穴，下置容五石大缸，每一詩成，書紙熟視良久，輒手取掇之，投穴中，積歲時，缸滿，好事者爭取之，稍傳布人間。

田按：長文遺詩，清迥無俗格，四明游籍，蓋與沈嘉則酬唱者，濡染其習，稍涉俗韻。

獨立

漸少區中累。蹉跎歲暮天。煙霞常引疾。犬馬欲忘年。山課松楸稅。園收芋栗錢。寥寥一生事。獨立意翛然。

偶作

嘿嘿竟何意。栖栖常避人。乾坤存一壑。風雨過三春。錦帶慙居士。青山作外臣。衡門有尊酒。長日傍松筠。

歸望山茨有作

秋陰自寥廓。況復遠林歸。一水孤舟入。高天亂葉飛。江雲晴稍薄。山日晚猶暉。何事東溪上。行吟老竹扉。

費元祿二首

元祿字無學。鉛山人。有甲秀園集二十八卷。轉情集二卷。

田按。無學詩小有才致。習與陳眉公。周方叔遊。故所著轉情集。不離二人窠臼。

聚景園

江山無恙黍離哀。宋主巡遊有故臺。紅粉六宮俱是夢。翠華萬乘幾曾來。芳原花石歸新主。異代園林集上才。申使不歸陵寢變。官梅今作野梅開。

汨羅

二水紆迴弔屈亭。荆門渺渺浪冥冥。離騷宗社憂同姓。放逐江潭怨獨醒。芳杜涼風舉曲渚。木蘭秋露飲

寒汀欲招楚些蛟龍窟。蕭颯楓林兩岸青。

逸希韓一首

希韓章邱人。

山居

老性習成懶。日高開戶遲。破囊惟貯藥。活計只工詩。竹影搖山色。花香入酒卮。流光不少待。催我鬢成絲。

吳孟堅一首

孟堅失其名莆田人。

田按孟堅遊章巖詩見費無學轉情集無學稱孟堅賦才雄偉行麗精深博敏蓋才士而淹鬱終者莆田又有藍翰卿詩云名踪安可窮去去勿復辭不愁人行惻甯無衰歇情誰令志不舍長與古今愁高煙白日寒千秋長不虧游媚性所拙慙悲甯可裁鑿已固已省狗物亦難任勞思不能寐感物愁逾昨湯義仍稱其憤切怨幽當令稽謝掩泣義仍贈翰卿詩云不謂嶺海內乃有淵雲出推挹甚至吳藍二生詩選家未錄余亟登之

游章巖

千仞峯頭一振衣。青天歷歷踏斜暉。醉來爭拾金光草。騎得茅龍帶月歸。

朱應龍一首

應龍字舜夔一字近臣鄞人有東籬樂府。

靜志居詩話。東籬與沈明臣、葉太叔、盧溹齊名。號明州四傑。乘月飲海上。大醉溺死。其短歌行云。皎皎月明。駕言宵征。唯君之故。不違自甯。說者以爲近於讖也。

短歌行

人生幾何。樂少憂多。彼逝者日。如江如河。解一歌當以謠。莫如心勞。何以忘憂。唯有松喬。解二我思故人。在河

之瀕。欲往從之。渡涯涉津。解三皎皎月明。駕言宵征。唯君之故。不違自甯。解四桂楫蘭舟。泛彼中流。今夕何夕。

載酒遨遊。解五臨風鼓瑟。中心弗鬱。弗鬱者何。所懷非一。解六黃鵠高翔。日遠故鄉。徘徊中道。風雲激揚。解七山

忘其高。水忘其深。智哉古人。實獲我心。解八

嵇元夫二首

元夫字長卿。歸安人。有白鶴園集。

贈天機上人

高僧修道處。精舍與人違。樹密松關暗。溪深石徑微。巖扃青靄接。澗戶白雲歸。塵累何能斷。從師此機息。

立秋日蘆溝送新鄭少師相公

單車去國路悠悠。綠樹鳴蟬又早秋。燕市傷心供帳薄。鳳城回首暮雲浮。徒聞後騎喧乘傳。不見羣公疏

請留。三載布衣門下客。送君垂淚過蘆溝。

靜志居詩話長卿父編修世臣嘉靖辛丑分校禮闈高文襄出其門長卿少年簡傲獲罪嘉興某推官坐死文襄營救獲免招入都執其手語朝士曰此天下才也及文襄去位乘牛車出國門欲日始有馳傳後命長卿之詩蓋紀其實也一時傳誦謂陽關三疊河滿一聲無此淒楚

吳紹奇一首

紹奇字叔甫桐城人有撫松集

秋晚山寺

手攜藤杖入林巒藥碗芝房次第看竹徑野煙迷鳥路寺門秋水狎魚竿芙蓉浥露花全放躑躅因風葉半殘箕踞一尊懷欲遣恐驚搖落不成權

吳鑽一首

鑽字汝震鄞人

漫興

戶外澄溪漲綠波暖風約水動新荷竹根稚子千頭出昨夜前山雷雨過

張振藻一首

振藻字去華松江華亭人

田按去華詩見張懋忠客乘

呈張師聖標

山盡重關迴。霜高萬草枯。適當閒戰馬。豈爲塞飛狐。末路懷終切。清秋病未蘇。直憐歸隱計。緩急古人無。

明詩紀事卷二十七

庚籤

孫鎮十四首

鎮字甯之掖人

濳音集。王西樵曰。甯之擬古樂府。得其聲情。自是絕技。五古秀挺。七言歌行跌宕有氣。王貽上曰。甯之五言頗學漢魏。三謝。然自是盛唐佳境。時有桀驁之氣。浮動眉宇。七言放歌。雜之杜陵。幾難復辨。至擬古樂府等作。古崛奧衍。斑駁陸離。直與北地抗行。惜其長轡未駢。而芳蘭早凋。今天假之年。吾未測其所至也。

田按。于麟擬古樂府。爲世口實。自後齊人如于無垢。公孝與皆有緒論。以于麟好古釣奇。不能自爲一詞。至譏爲探赜騰篋之間。乃藝林之根蠹。學人之路阱。甯之生後于麟。乃能爲古樂府。古直蒼涼。自以爲今人作古語終不似。斯其所以爲似也。近體摹倣少陵。時有奇句。選家錄明詩。無有知甯之者。王西樵教授萊州。編濳音集。乃取甯之詩而論次之。世無西樵。如甯之者。亦埋沒於荒煙蔓草而已。

隴頭水

隴頭水。一南一北。流連四下。五步一歎息。十步一徘徊。嗟我行人。心胡以南。身胡以北。當風激波。淚下纍纍。酌彼隴水。山上傾澆之。使爾南不得南。北不得北。請與諸君鼓隴胡。我心我身兩分徂。上方依希主知

之。

擬古善哉行七解

驚風飄日。奄忽沈山。徘徊四顧。壯士摧顏。我懷殷憂。悽愴無歡。俯視流波。涕泗洑瀾。解一昭昭明月。陰雲四

起。晦跡窮山。探歌芳芷。寶鼎中燔。奇服外緇。芳香暗投。誰復知矣。解二鼓鐘嘈嘈。不如雅彈。醇醪烹炙。尙思

綺紈。金碧綵錯。志在麻菅。澹泊自然。可以忘餐。解三世態反復。悠悠莫測。我伊有懷。夜不能息。引領關河。慙

無羽翮。吐氣慷慨。懼爲人識。解四地迥天高。安有通津。蹉跎久別。特達無因。積怨成疏。緣困含辛。可當奈何。

委望慈仁。解五碁壘惟傾。寵極無恩。古有忠誠。鮮復得完。瓦礫見收。而棄璵璠。仰望參商。悲何可言。解六夙駕

焉薄。于遊于盤。六龍飛輿。出入雲端。俯觀下都。憂心晻晻。元膏玉液。徒勞苦艱。解七

田橫島

賢豪無近圖。列俠羞人下。所輸隆準公。逐鹿先得者。豈惟齊田橫。不能保宗社。其徒五百人。安不逃之野。王侯如浮梗。身世等飄瓦。仗劍盡從之。血流海波赭。漢庭何耀煌。如此高義寡。萬古懷英聲。臨風淚堪把。

幸臺

晚登古臺上。北風何蕭蕭。海空蜃樓滅。天廣蓬山遙。漢武昔愛仙。巡遊此招要。稅駕當利城。山川莽來朝。行幄豈不華。勢欲凌雲霄。安期不可待。龍顏亦已凋。霓旌變浮煙。笳鼓散鳴潮。地古池館盡。年深碑版消。

如何千載下。雄名喪輕飄。龍去不再還。烏噓夜寥寥。惟有舊時月。依然滿山椒。

大珠石室

巍巍大珠山。其高逼星斗。衝擊聞波潮。豁爽見陵阜。白日落海上。青天挂峯首。劃然古石室。元冥何代剖。時時雲霞出。夜夜風雷走。古來棲真仙。藥室留石臼。如何縛塵纓。不見長年叟。我欲棄家遊。不知終得否。

出香山寺登南嶺下大澗晚投碧雲寺作

策杖躡南嶺。表裏望畿甸。愛此山川佳。行歌不知倦。雖無絲竹陳。頗有魚鳥翫。積翠來遠峯。白雲下長澗。偃臥春草間。好風時微扇。出谷天地開。轉徑松蘿換。煙深鳥雀集。山暝牛羊散。返照竟千里。都城如白練。的的桃李明。爛爛襟袖變。返策投珠林。鐘聲入雲漢。跌坐對菩提。恍如登彼岸。

行役二首

朝發任邱城。夕過淇水渡。落照下遠空。長楊夾廣路。水流日不返。人去亦不顧。長歎問僕夫。蒼茫古隄暮。纍纍一古塚。云是扁鵲墓。歲久荆棘生。野荒狐兔聚。悲風自天來。搖落西郭樹。日行兩舍餘。動我千百慮。何當解天刑。游仙謝巾屨。

薄海多曠野。晚入蕪城臺。冥冥孤館閉。颯颯寒風來。停車謝候人。獨坐心徘徊。瓦燈照素壁。蟋蟀吟空階。命僕沽市醪。一酌心懷開。醉來藉草臥。倏忽雞聲催。悠悠出郊郭。四望何悲哉。平原人迹稀。惟見蒿與萊。

况復年歲饑。千里但黃埃。苦樂大地偏。民生信可哀。

曉起簡伯韶

醉眠簾光曙。絺衣聊試展。長嘯振松風。地偏欣迹散。依林坐理髮。還向清泠盥。澗淨華藻生。山明白雲捲。嚶嚶好鳥鳴。垂垂露珠泫。危峯落匡床。殘花覆苔蘚。念子澹蕩人。獨居誰爲遣。浮世無長生。何爲不遊行。載酒攜素琴。經過病堪免。

徐爾行自青州來視余病。病良已。館庇意山房旬月。迫欲歸。作歌贈之。

去年冬走長安城。長安飛雪燕山平。王侯見士如見鬼。黃金爲寶文章輕。歸來閉戶渴欲死。林間病骨相支撐。徐郎驅馬青州道。高談七發雄風生。病夫起坐感離別。寒暄數語形神清。我悟浮生破千古。虛名恥與時人爭。徐郎持杯勸我酒。醉我不覺參斗橫。殘月入城銜柳色。白雲出岫和鐘聲。斗水不足活長鯨。閒情可結沙鷗盟。徐郎不住欲何往。世態乾坤兩骯髒。君年四十老書生。我今多病頭顱長。遠離重逢知得否。況乎死生如返掌。臨歧強飲數百杯。眼看落日沈高臺。揮鞭一語不能出。海邊雁斷天風來。

宿樊桐以早春遣興詩見示漫賦答之

生理何聊賴。淒其一病身。石橋煙報柳。山路鳥曉春。琴酒多妨俗。詩書卻誤人。莫言名利事。一醉落烏巾。

羣盜

殺氣生羣盜。妖氛失漢旌。黃巾橫四野。白日閉孤城。守吏無人色。蒼生有哭聲。恐煩東郡顧。垂望正含情。

秋懷

黃金臺畔草蕭蕭。碣石宮煙鎖寂寥。市駿代非遺骨盡。談天名在古人遙。平沙落月迷寒雁。荒塞征蓬走夕飈。今日悲歌徒感慨。英靈千載不堪招。

乾光殿西苑

漢家西苑接朝陽。飛闥天開倒日光。十丈珠簾垂錦繡。千年鐵檜老風霜。彤庭夜月懸鵝鵲。紫閣晴雲遶鳳凰。誰道御容深不見。鶯花猶得近君王。

陸弼六首

弼字無從。江都人有正始堂集。

四友齋叢說。余見扇頭詩有云。匣有魚腸堪借客。世無狗監莫論才。余極愛之。以爲近代之詩。亦難得如此者。後題名曰陸君弼。後訪陸。乃江都人歐崙山弟子也。

盛明百家詩。陸客詩瀟灑精爽。

列朝詩集。無從老爲學官弟子。自髻髻至老。治博士家言。伊吾與吟哦。併日分夜不少廢。又好博涉。多所撰述。廣陵爲南北孔道。結納賢豪長者。其聲藉甚。趙蘭谿當事。議修正史。請徵故知縣王一鳴。故通判魏學禮。太學生王穉登。生員陸弼。入史館纂修。未上而罷。年七十餘。乃卒。無從稱詩。起嘉靖末年。推尊王弇州。幾欲鑄金頂禮。弇州敘平生文字四十餘人。顧不及無從。久

之海內爭抨擊王李無從亦心動悔其少作而迄不能改也王承甫評正始堂集曰戊辰以後多染時調乙未以後乃爲陸無從詩人謂承甫前評爲確而後評未必允也

田按無從才調翩翩後語疊出雖染指弇州尙不至如牧齋所譏

立秋前一夕夏玄成席上觀吳姬薛素素挾彈戲因賦長歌贈之

華堂殘暑雨失驕。輕颺颯颯吹絳袍。主人開宴呈百劇。鸞簫羯鼓聲嘈嘈。吳姬座上薛靈芸。文俠風流迴絕羣。酒酣請爲挾彈戲。約束青衫聊一試。微纏紅袖袒半構。側度雲鬢引雙臂。侍兒拈丸著髮端。迴身中之丸并墜。言遲更疾恰應手。欲發復停偏有致。五步之內態橫生。曲折回旋皆可意。珠抵金投未足憐。檐鶯幕燕驚相避。須臾收繳立徘徊。月上雕軒客未回。絲停竹罷催紅燭。更將談謔送行杯。蘭溪胡生爲我友。百藝稱卿不容口。獨傳彈射妙當年。相逢卻在燕臺邊。將軍曾鑄黃金埒。薛時爲李征蠻所嬖細馬輕弧態轉便。長安道上多游俠。若箇經過不住羈。此時爲賦春江曲。寫徧卿家小樣箋。

桐江舟中逢吳明府

春水浙西船。相逢意氣憐。白雲談塵外。芳草鬢絲前。地是桐君隱。官同茂宰賢。姓名堪自愛。莫藉衆人傳。

禪智寺送月上人歸黃山

長蘆初問法。歸去暢玄宗。一衲空山裏。孤雲何處逢。寒潭獨夜月。秋雨舊房松。回首茱萸路。相思隔暮鐘。

秋日懷龐學博

蕭蕭一徑入秋苔。束帶時愁長吏催。旅食又看鴻雁至。家書常共荔枝來。花邊小几聽禽坐。竹裏孤琴候客開。千載賦成傷不遇。白頭誰惜董生才。

贈吳姬薛素素

纓絕鈿遺漏欲分。留髻送客意何勤。酒闌明月生瓊樹。坐久流螢點繡裙。子夜歌來猶是夏。巫山夢去總爲雲。羞將錦字傳哀怨。清磬長依貝葉文。

贈金陵馬姬

杏花屋角響春鳩。沈水香殘懶下樓。翦得石榴新樣子。不教人見玉雙鈎。

鄭琰四首

琰字翰卿閩人。有二陬詩稿。

西樓集。翰卿塞上諸稿。音調適雋。在王維、李頎雁行。

徐渤榕陰詩話。鄭翰卿工七言。少遊邊疆。集中多悲壯語。如馬邑吹笳烽子急。雁門獵火健兒歸。霜色欲將關樹折。河聲如帶戍樓奔。砂磧到天歸。馬小朔雲連海遠。鴻低劍戟已銷兵。後火。飄飄猶泣戰時瘡。磧上陰雲連塞黑。關前落日帶沙黃。亂山獨馬嘶殘月。遠磧離鴻叫曙霜。胡騎分營來漢塚。蕃河流水到秦川。讀之有封狼居胥之志。

列朝詩集。翰卿豪於布衣。任俠。遨遊閩中。詞館諸公。爭延致之。高文典冊。多出其手。每閉閣不聽出。翰卿笑曰。吾具有鬚眉。安

能作三日新婦。悒悒悶死。遂跳之金陵。新安富人吳生延居幸舍。以上客禮之。翰卿醉輒罵主人。呼爲錢虜。吳與其兄構訟。疑翰卿泄其陰事。文致捕置京兆獄。竟瘐死獄中。

靜志居詩話。翰卿詩名藉甚。興致故超。七言近體。全得力於唐詩鼓吹者。

田按。翰卿好作狹斜遊。工於言情。邊塞之篇。尤推豪唱。

哭李大將軍

十萬旌旗染血丹。招魂夜夜哭桑乾。殘兵來拾中郎印。野鳥飛登上將壇。金獸鎖門嚴鼓角。石麟窺塚葬衣冠。至今唵答騎胡馬。猶是將軍舊戰鞍。

汪懋忠七十從軍之燕

千金紫馬百金裝。白首窮邊烈士腸。一雁正來君又去。二毛雖短劍還長。燕臺馬死崩寒日。易水魂歸哭夕陽。筋力尙堪三日戰。牙旗秋捲塞雲黃。

春日卽事

荷葉田田柳葉齊。女郎何處唱銅鞮。春衣隊遇頻嘶馬。社酒人歸盡鬪雞。二月杏花三日雨。千山杜宇一聲嗶。年華逐漸東風去。腸斷虹橋小苑西。

春日西湖卽事

蘇小門前柳帶煙。煖沙晴日水如天。杏廳供作宜春酒。榆莢分爲買笑錢。垂柳綠遮騎馬路。落花紅襯釣

魚船杜鵑不解遊人意。催盡韶光又一年。

曹子念一首

子念名昌先。以字行。更字以新。太倉人。有集十卷。

王衡維山集以新詩聲格氣韻大抵步趨弇州先生。

列朝詩集以新王元美甥。所謂近體歌行酷似其舅者也。爲人倜儻。重然諾。有河朔俠士之風。

除夕袁中郎縣齋守歲

江左平疇白浪遙。賃春空寓伯通橋。蓬門歲計羞藜糝。花縣春情惜柳條。梳髮鏡中霜易賈。寄愁天上雪難消。流光不爲浮生住。挑盡寒燈夜倍迢。

裴邦奇六首

邦奇字庸甫。聞喜人有巢雲集八卷。

田按庸甫詩語新而調適。自是布衣之後。

寄題海峯蘭若

聞道幽栖處。山房傍水潯。鶴盤青嶂遠。僧臥碧蘿深。海月低禪榻。天風送梵音。西遊定何日。蘆葉渡江心。
五日獨酌寫懷

白髮新年長。青山舊業貧。旅懷驚節序。客計老風塵。草閣偏無暑。蒲觴別有春。醉鄉淹日月。誰是獨醒人。
夏宴彩雲洞

洞天何爽塏。溽暑得清涼。雲液傾尊綠。松風拂袖香。花開河朔宴。人醉午橋莊。樓外簫橫玉。翩翩下鳳凰。
雨坐

驅暑開松閣。鉤簾對石屏。凱風吹細雨。長日落空庭。鷗泛沙痕淺。龍歸水氣腥。塵纓都濯盡。逸興寄滄溟。
龍樹峪

踏磴扳蘿深復深。春山無處不登臨。雲盤鳥道青冥上。雨挂虹梁白晝陰。松外石壇留鶴跡。洞中山鬼作龍吟。酒酣欲擬登高賦。萬里風煙壯客心。

過呂岫雲綠井莊

巖居相訪嘯煙霞。草樹遙連石徑斜。綠酒同傾陶令宅。青山重眺謝公家。牕雲曉拂千竿竹。池水秋鳴兩部蛙。便欲從君歸舊隱。西風垂釣白鷗沙。

聞龍一首

龍字隱鱗。鄞人有行藥吟。幽貞廬詩草。

甬上耆舊集。隱鱗生有至性。五歲喪母。哭聲感路人。以憶母畢生長齋。性愛佳山水。以父在。所出未嘗踰百里。惟遊四明山。曾

過旬日。屠長卿有言。鑑水。隱鱗作天際。眞人想。其風格可見也。

靜志居詩話。隱鱗以孝友德性聞於鄉里。初不以韻語自負。然其近體頗閒整。特少警拔耳。

訪豐吉甫

兄弟爭高臥。風煙各杜門。綠尊忘歲月。白眼睨乾坤。壁挂魚腸劍。竿挑犢鼻裋。時人未之許。捫蝨與誰論。

程可中一首

可中。字仲權。休甯人。有汶上集二十二卷。

四庫總目。可中詩亦七子末派。

過白溝河

白溝河水逝東奔。燕馬南來河水渾。原草百年般戰血。陰風半夜鬪遊魂。明堂又喜朝元后。率土空教哭聖孫。回首漫憐方正學。茫茫青史不堪論。

葉太叔三首

太叔。字鄭朗。更名亭立。改字介子。鄞人。有思煙集。藏山稿。

甬上耆舊集。鄭朗五律。氣格高澹。轉造自然。

田按。鄭朗古詩。酷摹長吉。刻鵠不成。五律清矯不羣。布衣詩之有骨幹者。

夜過山陰

夜發山陰棹。翻思舊日經。雁空聞鏡水。雨自溼蘭亭。孤燭帆前闌。千峯夢裏青。客懷牢落甚。躡鬢欲星星。
閒居

身外本無緣。逍遙轉自憐。養生感逝水。閱世學枯禪。道以閒能長。名因傲不傳。何妨居寂寞。遣興有詩篇。
久不出籬門

久不出籬門。唯堪對酒樽。是非吾自曉。險薄世難論。老坐青氈穩。貧居白屋尊。料無能報力。莫易受人恩。

安紹芳三首

紹芳字茂卿。無錫人。國子監生。有西林集二十卷。

田按。茂卿家席厚貴。闢園池。有西林諸勝。王弇州記之。詩調平適。時有清音。

月夜社中諸子飲。余水閣因誦唐人淮水東邊舊時月。夜深還過女牆來。遂用爲韻得時字。

六代興亡地。千秋絕妙詞。與君重對酒。懷古有餘思。恨逐寒潮盡。歡留夜月遲。不須商女唱。已是斷腸時。

舟中望金山

挂席經孤嶼。躋攀惜未能。塔喧棲嶺鳥。窗倚聽潮僧。煙澹暮一色。樹凋秋幾層。旅程應可計。遠浦見寒燈。

汪子建卓激父姜固孟葉茂長楚僧東明訪余西林分得來字

誅茆聊傍碧山隈。一徑松蘿窸窣開。溪鳥不驚高客過。嶺雲能伴野僧來。煙霞一壑容吾長。風雅千秋見

爾才擬借清輝招共隱。籃輿無那夕陽催。

明詩紀事 庚籤 卷二十七

二五九九

明詩紀事卷二十八

庚籤

瞿汝稷一首

汝稷字元立常熟人侍郎景濬子用蔭補官遷刑部主事歷郎中出爲黃州知府改邵武辰州遷長蘆鹽運使以太僕少卿致仕有問卿集

四庫總目汝稷集前有樂向高所作墓誌銘稱汝稷最不喜溫陵李贄以爲得罪名教其識實出明季士大夫上其詩文則未能凌跨流輩也

涌泉庵

雲磴透迤入松蘿杳靄深一燈燃慧室萬綠覆慈林野鷓馴僧定寒泉涌梵音可容塵世客猶繫子牢心屠本峻一首

本峻字田叔鄞人尙書大山子以蔭授刑部檢校遷太常典簿歷南禮部郎中出爲兩淮運同改福建遷辰州知府有屠田叔詩草

筆精屠田叔詩談云近時崇尚甫解之乎輒使啞啞稍習擊偶連齏聚梨人靡不握管城以摘詩詩無不巧玄晏而爲序詩道崇尙無過今日清風輟響亦無過此時

甬上耆舊集。田叔官太常典簿。因撰太常典錄。記國家郊祀大典。時比諸唐王涇郊祀錄。宋文彥博大饗明堂記。生平喜讀書。至老尚手一卷。人曰。老矣。奚自苦。田叔曰。吾于書。飢以當食。渴以當飲。欠伸以當枕席。愁寂以當鼓吹。未嘗苦也。起生攢子甬上。撰狀及表。自稱曰。慙先生。一時詞家。俱奉爲祭酒。

入會稽

會稽稱大郡。風壤舊京華。綠水灤南鎮。高城遶若耶。郡中輸竹箭。山上起官衙。但恐芳蓀歇。扁舟問浣紗。

費懋謙一首

懋謙字民益。鉛山人。以蔭官南都察院都事。就遷左樞參軍。

玉筍詩談。民益以貴公子折節下帷讀書。性又喜吟。青溪之社。民益實首倡之。又構籌筆軒。客星棧。淪茗焚香。山人墨客。延接無虛日。閩有王山人者。善寫梅。民益卽從作梅。金陵陳子野善墨竹。民益卽從作墨竹。晉江黃孔昭工山水。民益卽爲山水。皆得其意。

送朱秉器之渝州太守任

追隨白社六年餘。羨爾新詩獨起予。遠指雙旌臨錦水。先驅五馬向匡廬。江梅試煖離觴劇。苑柳迎人執袂初。重握春風更何許。涪江魚雁莫教疏。

吳稼澄四首

稼澄字翁晉。孝豐人。僉都御史維嶽子。以蔭除南光祿典簿。累遷雲南通判。有玄蓋副草二十一

卷

列朝詩集。翁晉弱冠稱詩。爲弇州。太爾所推許。長而掉鞅詞壇。勃窣苦心。自漢魏以及三唐。無不含咀探擷。然而遊汪王之門。風聲氣韻。多所熏染。求其超乘而上。則未能也。

靜志居詩話。翁晉樂府。如健兒騎駿馬。左右馳突。靡不如意。近體頗合西崑。

礦山謠

礦商聚中野。各各不相下。珍寶餽中官。黃金餽主者。淘沙千金得。銀百公私費用兩無益。詔書來。詔書來。中官忽變置。主者顏色如死灰。山頭血出金氣死。誰作封章報天子。

驄馬

青驄白玉鞭。綠草去翩翩。夜月隨公子。春風逐少年。驕嘶垂柳外。顧影落花前。何日征驍虜。長驅赴朔邊。

同溫長卿登金山

江勢搖坤軸。江光沒鳥痕。微茫窮四表。突兀見孤根。疊嶂連京口。驅濤入海門。同遊指奇絕。落日更開尊。

代寄徐仲容

秋雨蘇蘇滴井梧。風吹妾夢到東吳。生來自恨青溪近。獨處無郎似小姑。

田藝蘅一首

藝衛字子秬。錢唐人。副使汝成子。以歲貢爲休甯教諭。有田子秬集二十一卷。

四庫總目：藝衛在嘉隆間，猶爲博洽，而詩格頗嫌冗漫。

列朝詩集：子秬十歲從其父過采石，賦詩云：白玉樓成招太白，青山相對憶青蓮。寥寥采石江頭月，曾照仙人宮錦船。

戎政府

大將新開戎政府，門外列校如狼虎。團營十二坐指揮，此生焉能與噲伍。咸寧旗偃虜騎來，咸寧旗出虜騎回。九廟震驚本兵死，帳中歌舞方行杯。寵錫如山印如斗，君恩愈深臣愈負。兔窟深藏屠酷兒，駝幃屢納單于婦。平頭奴子腰盡黃，不獨秦宮花底狂。內家珠玉耀權室，錦衣目側咸中傷。猿雞飛去癰疽潰，痘發時室中有物如白猿白雞飛曾公夏公來作祟。疾革時自言見兩公來西湖一莊不忍捐，帶礪山河向西北去。謂是其夫婦生肖也片言墜劈棺，僂屍梟九邊嬌妻稚子橐街懸。誓書未及傳三策，血食甯知絕九淵。郿塢空爲萬年計，落花滿地朱門閉。雞鳴狗吠散如煙，寵姬給配功臣第。就裏尤誇俞七兒，新人重事尙嬌痴。鬧裝寶束今何許，玉帶曾勞妬柳枝。七兒姓俞氏，家奴洪定女也。爭繫玉帶圍其嫡洪不與乃自製七寶鬧裝金束其值蓋巨萬計云。

田按：子秬戎政府一篇，詠咸寧侯仇鸞事也。詳見弇州將軍行。

袁應福一首

應福字華宇，貴陽人。官來鳳知縣。有漁磯詩草。

黔詩紀略：華宇詩亮節清音，獨具風格。

歸來

歸來無一事。花竹伴吟身。落日清秋暮。荒園叢菊新。病憐高興減。老愛舊書親。猶有忘言趣。停杯望可人。

潘光統二首

光統字少承。廣州順德人。以貢入國子監。除光祿署丞。有滋蘭集。

秋望

越王樓閣倚蒼巒。別苑離宮草樹殘。正朔已非秦日月。朝臺猶憶漢衣冠。風生禾黍樵歌歇。秋入關河夜柝寒。閒倚青萍時極目。不知何處是長安。

閨怨

幽人畏人知。深閨獨閉時。莫令秋月入。照見妾空幃。

林世吉一首

世吉字天迪。閩人。尙書爌子。以蔭官戶部郎中。有叢桂堂集二十卷。

挽法偉上人

杪秋經古寺。一徑掩蒼苔。說法人何在。參禪客獨來。溪雲侵講席。山月暗香臺。塔下菩提樹。猶傳手自栽。

杜開美三首

開美、字袁度。上海人。用薦除文華殿中書舍人。有秋水、遠遊、扣舷、貂裘、潤州、白門、敝帚、行藥、蝸甲、
閒居諸草。

訪王延年不遇

端居寡歡。攬衣出西郭。緒風吹我衣。水田曠漠漠。眷彼中林士。埋照臥邱壑。雙扉晝不開。白雲抱幽閣。
獨往不知處。青天騎野鶴。

茅山抵家有作

青雀西飛千里行。江春兩岸聽嘯鶯。拾將瑤草尋仙侶。開徧山花送客程。偶去暫違黃浦月。歸來仍傍赤
烏耕。入門把臂紛相問。爲說煙霞裏盈。

客舍苦雨

卽看春草綠。知長故園薇。爲語留晴色。征途伴客歸。

邱峻一首

峻、字惟高。桐城人。貢生。官始興教諭。

畫山水

翠滴松梢雨乍收。山光半爲白雲留。江邊可惜無人住。閒卻蘋花一段秋。

顧從義一首

從義字汝和。上海人。以善書授中書舍人。遷太理評事。有硯山山人詩稿。

田按。汝和頗稱好事。家有玉泓館。摹宋本淳化帖藏之。名重於時。多藏法書名畫。香光稱汝和所藏。以顧愷之女史。李公麟瀟湘九歌。蜀江四卷爲最。入本朝。先後歸內府。爲石渠寶笈著錄。

和張長輿西園白雲塢

古巖多莓苔。修篁潤几席。往來無雜賓。白雲自朝夕。

趙士亮二首

士亮字汝寅。掖人。貢生。官東安知縣。有龍溪草。

濤音集。王貽上曰。丹澤與孫甯之。宿變桐鼎立一時。秋興塞上諸篇。已造境地。田按。玩秋興一篇。似汝寅鼎革後尙存。

蓬萊閣

東望蓬萊近。十年思一遊。今知滄海大。始信九州浮。赤日波中浴。青山水上流。荒城潮汐苦。晝夜打濤頭。

秋興

王氣鍾山近。有無金陵自古帝王都。松杉猶帶前朝色。臺殿時思佩玉趨。蒼鼠晝冥翻碧瓦。荒苔秋老鎖瑠鋪。石城北地秦淮水。想像當年入霸圖。

劉繼善一首

繼善字元卿寶應人貢生除鎮江訓導有掩關集二卷

田按掩關先生爲余友震青侍講□世祖訓導鎮江砥礪士行力任名教子永澄以名行著世德清門至今稱之

自賦

白田居士老青氈。四壁蕭蕭別有天。舊積圖書消日月。新成詩句媚林泉。鴻賓燕侶看來往。滄海桑田感變遷。荒徑客來留共醉。阮生那惜杖頭錢。

明詩紀事卷二十九

庚籤

邵正魁一首

正魁字長孺。休甯人。國子監生。有梁園燕臺二集。

玉筍詩談。長孺客金陵。入青溪社。一日訪予官舍。會雨雪。余遣騎送之。因就社中作雪中借馬詩。遂爲一時佳侶。

贈朱孟震入覲

郡侯不與省郎同。倒屣猶存下士風。詩自中和稱益部。社會淪落問吳宮。時名海內千金重。世事尊前一
笑空。霄漢憐才公等在。豈堪結侶五湖東。

周才甫一首

才甫字文美。永嘉人。有雁川集。

玉筍詩談。周山人才甫。隆慶辛未入青溪社。喜作梅。每對客。酒間命筆。殊可人意。又自爲詩其上。詩才亦秀逸。

送王按察四川

憲府開西極。分符重地曹。帆前春樹遠。天上法星高。旌旆懸三峽。圖形按六韜。君才堪賦蜀。萬象待揮毫。

方問孝十二首

問孝字胥成歙縣布衣有蒼耳齋集十七卷

田按胥成與邢子愿遊子愿集中有與萬伯修書云兩年間凡託兩布衣爲郵一爲京口章廷綸一爲歙州方胥成二君畫法詩篇庶幾擅代蓋章以畫名方以詩名也胥成近體開朗雅有唐音

嚴先生祠二首

子陵恥縈爵所志在山澤長嘯歸富春一竿輕萬石雲來灘水暗月上苔磯白漢鼎今何之先生有荒宅漢室榮諫議先生懷隱情不重一時祿但釣千載名山從石瀨合江至桐廬清悠悠人間世所以稱先生

晚別周丈人

征途謝送者駐馬聞寒鐘落日有離色浮雲無定蹤憂人身易老夫子道難容明發兩相望秋山深幾重之秣陵作

擊楫出京口天南望帝鄉江從瓜步闊山入秣陵長落雁下寒浦遠波吞夕陽濯纓如可適吾道亦滄浪歲暮都城送方兵憲仰之赴嶺南二首

闕辭雙鳳下城指五羊東道路還鄉遠山川過嶺雄蓋飛炎徼雨旌捲瘴江風遙識兵威肅天南百寇空借問征南路迢迢幾月中雲迎漢使節山遠尉佗宮風色旌旗變軍聲瘴癘空遙傳霜雪少不與帝京同

秋日濟北送修法師還南海

來吳今去魯。南國事金仙。雨重尋山笠。潮高泛海船。千峯投暝寺。一鉢乞寒泉。後夜青天外。虛空處處禪。

歲杪留別邊翼卿

朔風燕雁滿汀洲。千里鄉心急暝流。時序又驚殘臘至。山川不是壯年遊。雲平海樹吞淮浦。雪暗江天失潤州。長劍角巾東路遠。貧歸誰憫黑貂裘。

晚次秋浦

蘆葦蕭蕭有雁聲。夕陽旅泊最傷情。江湖到處飄萍梗。身世無人識姓名。三楚風高寒葉落。九華雲盡晚天晴。誰憐宋玉悲秋甚。一段新愁賦不成。

送人謫宦楚中

天南何處動相思。暮雨蕭蕭斑竹枝。雲夢草生歸雁盡。江潭花落逐臣悲。芳洲白芷堪爲佩。去國青山好賦詩。早晚恩波還北闕。如今不是賈生時。

長干行

帆落溇陽口。鳴箏試一彈。隔船相問訊。同是住長干。

送春詞

病酒還沾酒。傷春復送春。君看惜花客。不是少年人。

梅守箕五首

守箕字季豹。宣城諸生。有居諸前後集。

弇州山人續稿。季豹五言。於漢魏時離時合。而其合者。并其氣度色澤得之。

靜志居詩話。梅氏一門。羣從。禹金最負時名。嘗後先過王元美。元美贈之詩云。從誇荆地人人玉。不及梅家樹樹花。季豹爲禹金從父。雖譽稍遜。然詠懷諸作。恐小阮亦當避席也。

田按。季豹古詩。氣駿而聲亮。視質古者有上下床之別。

送王博士返貴陽

驅車出北門。與君爲別離。攜手立徘徊。涕下忽交頤。涕下勉自匿。情至不能辭。嬾婉念舊歡。契闊成新悲。山海萬餘里。浮雲亦難期。縱有肅肅羽。臨風恐退飛。願爲阜下塵。從君以驅馳。

古詩

北風何蕭蕭。素雪相與期。寒氣時總至。歲月忽已違。久客在他鄉。愁寐中心乖。登高望不極。誰謂可當歸。我歌式微篇。涕下沾裳衣。

古意

自與君別者。日日臨高臺。雲天望不極。江帆安在哉。夜雨和淚積。秋風兼愁來。寒帷幽夢曉。落葉紛相催。

清溪館贈詩

郎豔解歌白石曲。懊儂故作清溪辭。心招暗託調絃思。目成自有將花時。能憐繫馬疏柳外。長恨唳鳥高樹枝。獨眠無夢不易旦。雙笑有情多失期。葛根爛漫藕生孔。何處對面空相思。

破鏡詩

嫌名驚異獸。殘照委空房。不復圓光影。能窺半面粧。初弦臺上月。出匣枕邊霜。若問隋朝事。猶令人斷腸。

豐越人二首

越人字正元。鄞人主事坊孫。有天放野人集四卷。

甬上耆舊集。先生嗜學工詩。寄情蕭散。杜門散髮。翛然於修桐疏竹之下。興到輒詩。索筆直書。破窗頽垣俱滿。客時過從。至無從覓市襪。所深知惟沈嘉則。楊伯翼。先賓父數先生。性不喜交。蓋上人常見一時山人行卷。輒唾之曰。詩以道性情。豈爲汝輩行乞耶。先生詩有林泉無市朝。有懷巾無響項。有流連無襲慢。盡洗詩家之陋。

南峯

石磴盤空翠。炎風入座涼。滄溟流日采。青壁抱霞光。野樹侵吳密。江潮過越長。從來畏登眺。霸業幾銷亡。

山居

疊嶺分遙海。重湖逼太清。地幽無過客。春盡有唳鶯。徑轉垂蘿合。雲流大壑平。綠畦風蔓引。丹嶂石泉縈。

俗朴惟傳姓。花繁不辦名。由來山水趣。長此事岩耕。

欽叔陽一首

叔陽字遇公。吳縣學生。入國子監。有集。

稅官謠

千人奮挺出。萬人夾道看。軒爾木揭爾竿。隨我來殺稅官。

靜志居詩話。太監孫隆以督織造駐蘇州。朝廷方起稅額。惡少年行賄充委官。乘輿張蓋。勒索商稅。民不堪命。崑山人葛成率衆二千人。分作六隊。一人搖蕉扇前行。後執挺隨之。知長洲縣事鄧雲霄見民情洶湧。擒委官頭目。械於玄妙觀。衆立毆死。裂其尸。知府朱燮元勸諭。始得解散。此萬歷二十九年事也。時葛成慷慨就獄。後得宥罪。又二十餘年。而有顏佩章等。實先啟其兆云。

吳元樂一首

元樂字振之。休甯人。

山響閣讀畫錄。振之善琴工畫。筆法古勁。不落窠臼。每作畫。輒操琴一曲。然後揮毫。

讀劉孝標傳

辨命有深論。虛達明主前。獨比馮敬通。可爲識者憐。三同誠有之。四異有未然。患隨秋草沒。聲迹永無傳。

秦植一首

植字子培。無錫人。有清湖前後集。

和牧之廣陵遣懷

當年薄倖誤青樓。載酒重來悵昔遊。二十四橋明月滿。斷腸容易是揚州。

秦延勳一首

延勳字允元。無錫人。

送人歸梁溪

故山不可卽。遠望慰離羣。末路誰知己。臨歧更送君。歸心千樹雨。秋興五湖雲。好待東籬下。黃花醉夕曛。

吳明珍一首

明珍字季重。休甯人。

山中作

我本山中人。但識山中話。五月賣松風。人間恐無價。

吳伯敬一首

伯敬字長輿。宣城人。貢生。有綠潤園集。

贈程山人彥之

年少才名洛下聞。偶從花外挹清芬。遠遊不飲新安水。大隱還依笠澤雲。病借青山供起色。愁添征雁重離羣。卻憐寒氣侵衣袂。縞帶無能一贈君。

梅士勸一首

士勸字勉淑宣城人有唾餘集。

柏槻

八年重一到。山色尙蒼蒼。勝地應停騎。佳遊夙裹糧。虹梁飛木杪。雲瀑冷嵒光。昔日題詩處。藤蘿幾尺長。

王環一首

環字尙玉宣城人有蠨蛸集。

嶺南留別豫章夏生文煥

幾年筆硯共炎方。忽唱驪歌別五羊。荳蔻枝長方接席。菰蘆家在又還鄉。離亭曉送鷄聲月。客路秋分雁背霜。龍劍異時當合并。敢云潮不到潯陽。

袁鶴聲一首

鶴聲字汝明宣城人有鵝居集。

翠雲菴和陳山人韻

鍾徽一首

薇、字面溪。松江華亭人。

秋日宿塔院

水國氣先涼。地深塵鞅絕。殘經散不收。空庭舞黃葉。

馬懋勳一首

懋勳、字四銘。桐城布衣。

山行

過山聞犬吠。望望有人家。遙見翠微裏。開門掃落花。

馬之瑜一首

之瑜、字君璧。桐城人。有湖上草堂詩鈔。

九日書感

歲事三秋老。新悲兩鬢華。壯心銷白酒。愁眼對黃花。海內兵戈滿。江邊賦稅加。可堪驚婦子。無計守桑麻。

錢可久一首

可久、字思畏、桐城人。

西郭趙園

遊旅經時久。芳郊載酒頻。常因看花處。憶得故園春。筍迸籬根出。萍浮水面新。灑然逢一笑。聊爾任吾真。

齊鼎名一首

鼎名、字重客、桐城人。按察使之鸞孫。有蒯緱集。

登嶧山

策杖度崑巒。星辰掌上看。丹爐黃葉合。碧殿白雲寒。夏貢孤桐老。秦碑小篆殘。振衣凌絕頂。選石坐盤桓。

姚之邁一首

之邁、字汝碩、桐城人。有來青集。

送友人之粵東文幕

竟上越王樓。真成萬里遊。瘴雲隨地起。蠻海接天流。花放四時燠。文從五嶺收。鄉心莫易動。酒破鷓鴣愁。

朱廷佐一首

廷佐、字南仲、吳人。徙居金陵。有春雨堂集。

偕江靈巖登雨花臺小飲

暫快披襟願。涼風滿澗阿。好山連郭近。名士過江多。世事屢遷變。吾生惟嘯歌。登臺聊騁目。不惜醉顏酡。

卓發之一首

發之字左車。瑞安人。有漉籬堂集。

秦淮竹枝詞

楚歌湘曲未須哀。遙見燈船趁月開。長笛叫雲簫咽水。百千神女弄珠來。

汪宗孝一首

宗孝字景純。新安人。

金陵詩徵。景純江左大俠。憂時慷慨。期毀家以紓國難。卜居白門城南。築樓六朝古松下。好蓄古書畫鼎彝之屬。妾孫靈光善鑒別。王伯穀稱之。以爲今之李清照也。

和陳夫人牡丹詩

深葉繁枝庇苑牆。朱顏贏得配花王。風迴關盼筵間態。日映楊妃醉後粧。嬌豔由來稱覆錦。唐李進賢有牡丹覆以錦。穠華應許傍沈香。也知春盡饒清賞。燒燭相看更斷腸。

許經一首

經字令則。松江華亭人。

田按令則眉公弟子詩多俳體時能作才子語。

四印堂夜集觀姬人紫雲歌舞卽席賦贈

錦蠟屏圍潒水聲。上元時節遽聞鶯。不知杜牧才多少。直向當筵問姓名。

陸應陽二首

應陽字伯生。松江華亭人。有鳴雁、采薇、陸萍、香林、桃源、河上、荆門、白門、武夷、五茸、笏溪、問雪、懷舊等集。

露書陸伯生作詩。首首有鴻雁字。章元禮因呼爲陸雁。

田按伯生爲申吳門客。善書亦自矜其詩。沈虎臣痛詆之。謂其無一致語。然詩亦時有可采。

歲暮東歸道中志感

蕭條歲云暮。獨客返寒塘。尙守青氈舊。空令白日忙。潮喧孤棹急。鵠噪野田荒。自歎飛蓬迹。羞言志四方。

鄭州旅次用壁間陸君策韻

朔風吹落九河陰。處處寒衣急暮砧。一望薊門黃葉滿。始知秋向客中深。

明詩紀事卷三十上

庚籤

吳魁一首

魁字希元。歙人有梅臞吟稿。

春感

社信未傳燕子。春愁又逐楊花。消得幾番風雨。草塘處處鳴蛙。

吳鎮一首

鎮字時守。歙人有柏崖稿。

元日

架上書添新日歷。瓶中梅插舊年花。幽懷一段無人會。雪水爐邊自煮茶。

王勣一首

勣字汝嘉。南通州貢生。

城北樓登望

明詩紀事 庚籤 卷三十上

騁望孤城北。春雲雉堞高。年華新白髮。草色舊青袍。樹接天邊路。山連海上濤。憑闌無限意。落日首重搔。

江一山一首

一山字子雲。海門人。貢生。有雙蓮閣集。

園居

緩步向林麓。支筇對晚山。片雲心共遠。獨鶴意俱閒。花底清尊倒。風前倦鳥還。昨非今覺是。已愧鬢毛斑。

王醒之二首

醒之字夢叟。南通州人。有仙夷草。怡雲館集。

孿婦

盤頭烏絲雲不理。丫簪貼鬢鬢生耳。短衣褶裙跣足行。手把峒花腰繫藟。三三兩兩入城闈。賣歌賣笑不
畏人。侏侏亦解作華語。自言家是納糧民。孿婦孿婦花纂纂。交州市上春風緩。谿深箬密踏唱歸。竹籬開
處郎相攜。

泊銅陵見月

縣繞千山出。銅陵舊有名。江聲時齧岸。嵐影欲過城。貰酒從村市。逢人問水程。離家秋思遠。兩見月生明。

湯有光四首

有光字慈明南通州人有慈明集

山英社詩品慈明詩如西人造神仙酒醴水既備頃刻而成。可以供一時之歡笑。然味則近市。難鑿蘭陵之口。
田按慈明入范異羽山英社。近體時有警動之作。

送黃華父之岷縣

一尊江上別。江色引仙槎。夜雨錢塘樹。春風岷縣花。山將官舍繞。柳向驛門斜。念我耽遊賞。相期過若耶。

送王少微歸吳

西風吹不斷。萬里秋冥冥。楚地一尊盡。吳天片雨青。飄零遊子計。江海少微星。回首扁舟遠。離鴻不可聽。

廣陵寒食

邗江江頭拾翠行。薄羅初試東風輕。一百五日寒食過。二十四橋春水平。夾隄新柳綠於酒。何處短簫嬌若鶯。醉歸人向娼家宿。燈火滿街聞賣餛。

靈谷寺道中

紫翠透池路。幾重青山面。面削芙蓉雲。連內苑城邊樹。風送南朝寺裏鐘。御道人過時下馬。孝陵王氣日成龍。一尊到處俱堪醉。回首斜陽隔萬松。

葛幼元四首

幼元原名增字士修南通州人有海居集二卷浮槎集一卷行樂集一卷倚劍集二卷

陸弼正始堂集士修詩瓊詭跌宕雄視淮以南

一經堂詩話士修薄遊廣陵時南海歐植伯主竹西壇玷士修奉之爲師其詩專講聲調恪守師說斷斷不失尺寸

復歸江上別業

獻策適不用歸畊猶薄田狂於吾舌在名讓衆人先野鳥窺新屋江梅發舊年畫眉原不媿安得使人憐

自青霞館移居北屯草堂卽事

秋色澹然淨蕭蕭清客魂庭閒時度鳥樹老不遮門澤國平蕪斷殘陽遠水昏不妨蕭瑟甚幸免市嘲喧

茱萸灣遲黃使君希尹

湖上落葉盡客行今未歸青楓官舍冷華髮宦情微淮水日愁望薊鴻秋不飛浮雲那可問淚滿逐臣衣

江上送客

南去扁舟一葦輕焦公壇下暮潮生憑君莫奏筵篴曲楊柳春雲無限情

黎密一首

密字縝之番禺諸生有籟鳴集

古意

美人北窗下，含情揮素琴。上絃別鶴怨，下絃哀猿吟。一彈再三歎，悲來中輟音。帝子渺何處，瀟湘雲正深。

蘇景熙一首

景熙字汝載，廣東順德諸生，有桐柏山房稿。

空城雀

空城雀，何不飛去啄食玉山之禾穗，卻向空城拾螻蟻。螻蟻雖微，亦自愛其生，可惜城中人，闔室屠官兵，官兵殺人，不殺賊，搗鼓椎牛縱劫勒。

朱完三首

完字季美，南海諸生，有清暉館稿。

廣東詩粹，歐子建云：季美居粵城北郭之虹岡，栽竹數萬竿，梅數百株，閉門自娛，而問字索書者不絕，詩清婉有致。

山岡漫興三首

繞屋桑田百畝，當門松樹千株，牆東牆西蝴蝶，山北山南鷓鴣，石上風搖薜荔，花間雨滑蒼苔，新蟬響斷還續，暮鳥飛去復來，石上流泉飲鹿，雲中茅屋鳴雞，幽人策杖何去，採藥菖蒲寺西。

范之默二首

之默、字仲宣、寶應諸生、有我有軒集。

虎邱坐月逢雙梧禪師清話

月滿千人坐、登歌欲二更、清池搖劍影、蒼樹出鐘聲、悟石那成幻、開山此得名、因君析禪理、深自愧浮生。

乞菊

半生獨抱陶潛好、疏懶全無樹藝功、欲向君家乞名品、酒杯詩卷答秋風。

鄭爾忠一首

爾忠、字孝初、寶應人、有淮海、西遊、書柿齋、鸞音等集。

湖上

西風蓮葉渡、秋水蓼花灘、終日無塵鞅、生涯有釣竿、村醪濃似乳、溪蟹大於盤、有興聊孤酌、陶然詠考槃。

廖孔悅三首

孔悅、字傅生、上元諸生。

田按、傅生七絕、翩翩逸調。

偶集

春雨霏霏溼酒卮、滿堂紅燭對彈碁、主人先醉非無意、愁見更闌客散時。

訪道士

露草煙林斷客行。竹扉晝掩對高城。道人。不愛人天供。消受秋空鶴一聲。

酒家同彥先

苦說傷春還餞春。夜深唳鳥對沾巾。綠陰村酒城南市。同是尊前白髮人。

陳鳴鶴三首

鳴鶴字汝翔。懷安人。有泡菴詩選。

東南嶠外詩話。汝翔萬歷中諸生。棄舉子業。與謝在杭及徐與公兄弟共攻聲律。凡三十年。有東越文苑六卷。閩中考一卷。著錄四庫。其詩名泡菴集。卽與公所選定也。七絕最佳。

馬崑驛

春雨梨花暗馬崑。霓裳聲斷不勝哀。烏唳劍閣空相憶。人去驪山竟不回。驛路幾時迎翠輦。佛堂千載閉蒼苔。多情惟有華清月。還照宮中歌舞臺。

沖祐觀

吸露餐霞絕世氛。石壇親見武夷君。漢家天子多煙火。卻把乾魚污白雲。

古戰場

明詩紀事 庚籤 卷三十一上

二六二七

連天殺氣壓黃雲。鬼哭啾啾叵耐聞。日暮亂鴉爭白骨。不知誰是故將軍。

陳宏己二首

宏己字振狂。閩人。有蘆中馬東諸集。

泊黃山驛示王吳二宰

古驛黃山下。孤舟綠水涯。逢人盡鄉曲。獨客似還家。

苦竹派

明月沙頭苦竹青。鷓鴣嘯罷水冥冥。嶺南行客腸休斷。不似黃陵廟裏聽。

鄧欽文一首

欽文字徵甫。江陰人。有倚竹紀遊二集。

詩藪延陵鄧欽文詩素不知名。戊辰春余同黎惟敬諸子遊西山。歸各賦詩。鄧所作一首。特精工冠一時。

臥佛寺

佛臥何時起。空山日月低。花從開智慧。樹幾長菩提。世事浮雲夢。吾生待指迷。白毫如可卽。香象復來西。

董養斌一首

養斌字叔允。國子監生。有董叔允詩。

送人之咸陽

念君何所適。鞍馬向關中。驛路三千遠。河山百二雄。月明秦廢苑。花落漢離宮。惜別魂應斷。悠悠渭水東。

王應岳一首

應岳字重甫。侯官布衣。

送鄭景愛

淒淒風雪裏。之子欲何之。惜別一杯酒。重逢是幾時。霜寒雞唱斷。天遠雁行遲。隴上梅堪折。憑誰寄所思。

許樵一首

樵字巖長。莆田布衣。

露書巖長詩。酸楚流利。雖少含蓄。不失爲雅門鼓琴。

蘭陔詩話。巖長與同里吳元翰、張隆父、林希萬、黃漢表、盧元禮、高彥升、陳肩之、林彥式諸君結北山詩社。

社期阻雨有懷遠遊諸丈

幽期今日到清溪。白社雲深入望迷。驟雨斜風人聚散。青山綠水路東西。三春飛雁書來少。一別平原草又齊。此意蕭條鶯不解。閒關猶自隔林囂。

劉潢一首

潢、字師藩。上元人。有檀橋集。

舟行至蘭陰

澤國蒼茫景。扁舟接遠天。江明潮帶月。山暝樹生煙。櫓燕時留語。沙鷗自在眠。風餐兼水宿。旅夢動經年。

鄒景賢一首

景賢、字孟淑。上元貢生。

題宋田子濟畫雁

五國城邊白草秋。蒼茫艮嶽夕陽愁。帛書誰繫天邊雁。空向昇州憶汴州。

沈啓元一首

啓元、字端伯。六合人。國子監生。

永定寺

幽尋不憚遠。薄暮興還乘。敗葉鳴羅徑。霜花落豆棚。片雲閒對客。獨鶴懶依僧。更有東林約。今宵宿未能。

陳仲溱一首

仲溱、字惟秦。懷安人。有陳惟秦詩。

列朝詩集。惟秦詩。苦求工。不憚意不止。每出其詩示人。以手按紙。手顫口吟。人或誦其詩。口喃喃與相應。其自喜如此。

蘇小小墓

渺渺江天響暮潮。西陵黃土葬妖嬈。錢塘不是高唐路。油壁青驄總寂寥。

王崑仲一首

崑仲字玉生。閩人。禮部儒士。

金陵懷古

栖霞高嶺翠煙凝。玄武湖光似鏡澄。古渡遠迎蘭槳妓。名山深閉瓦棺僧。藻蘋歲歲功臣廟。松檜葱葱太祖陵。欲問六朝何處所。都人惟解說龍興。

陳邦注一首

邦注字平夫。閩人。有釣磯集。

古意

郎住橫塘東。妾住橫塘西。相思不相見。橫塘青草齊。

康當世一首

當世字孟擔。莆田人。

夏日睡起

明詩紀事 庚籤 卷三十一

山窗無處不藤蘿。欲賦閒居奈懶何。不信昨宵春已去。起看池上落花多。

姚貞一首

貞字元亮上元人。

別業

枳籬別業結山鄰。几明窗絕點塵。檻竹報晴仍帶雨。瓶梅裹凍固留春。彈餘綠綺茶聲熟。臨就黃庭墨暈新。門外一溪通約畧。半邀酒客半詩人。

陳椿一首

椿字汝大。閩人。有景于樓集八卷。

感秋

素月出東壁。涼風吹我襟。中夜不能寐。披軒彈鳴琴。物化有代謝。隙駒無停陰。勛名在盛年。卽事感何深。燕石旣混璞。驪珠復淵沈。誰收爨下材。一以徽黃金。

洪寬一首

寬字仲章。莆田人。

露書。洪仲章謂詩須弄韻。畫須弄墨。書須弄筆。亦必能弄韻。能弄墨。能弄筆。始臻佳境。

夏日同徐茂吳、臧晉叔、錢叔達遊西湖分韻。

丹嶂看疑畫，平湖望若空。層巒青竄外，古剎白雲中。水淨菰蒲綠，林幽木槿紅。風光已可樂，况復故人同。

何體性一首

體性字其容，廣州順德人，有朗吟軒稿。

有所思

浮雲西北馳，逝水東南去。有客正傷離，佳人在何處。烟消江練闊，湛湛青楓樹。日暮渺愁予，疏鐘度微雨。

王同軌一首

同軌字行父，黃岡貢生，除江甯知縣，遷南太僕主簿，有蘭香集。

列朝詩集行父嘗從吳明卿出遊，與王弇州、李雲杜善，作詩不多，自有風格，不欲寄諸公籬下，撰前後耳談，彙述異同，亦洪氏夷堅之流也。

赤壁樓上同弟綏父陪劉維芳雨集

登樓披秀色，尊酒暫從君。檻集千峯雨，窗流滿榻雲。魚龍寒自蟄，鴻雁暮爲羣。共醉空明上，人間世界分。

徐益孫一首

益孫字孟孺，松江華亭人，國子監生。

漱六齋集孟孺申楮握筆真兩京六朝之遺。

田按孟孺名列兗州四十子。余從屠長卿由拳集見孟孺序文。具有六朝人風致。徧檢諸集。無有錄孟孺詩者。後於松風餘韻。獲詩一篇。亟登之。孟孺非惟擅文藻。且有至行。母卒。結廬墓側。作文警墓。不復應舉。年未五十卒。惜遺集不傳。

春日登潮音閣

崇閣俯滄洲。乘春獻歲遊。鳴榔魚網集。倚檻水雲流。龍藏涵虛迥。禪扉入定幽。錫飛逢惠遠。相對狎沙鷗。

周如塤一首

如塤字所諧莆田人。

筆精所諧莆處士也。足迹不出戶庭。苦吟弗輟。未嘗妄與顯者遊。故其爲詩。綽有林壑之致。如風生極浦。潮常自霜。冷空林草。變衰。萬里寒山。橫積雪。半汀衰草。隱斜陽。百花潭上。漁竿在五柳門前。鷓徑荒。因嫌城市非吾土。卻傍漁家作比鄰。牆壓花枝。妨客過。泥濘苔徑喚人扶。等句。全無煙火食氣。

田家吟

不識市朝車馬喧。殘蓑籬笠老田園。柴門去郭無多路。野竹臨流自一村。春雨桑麻終歲足。清時雞犬幾家存。兒孫牧畜南山下。爲道須妨猛虎繁。

梁士奇一首

士奇平陰諸生。有樂府雜詩。

山行

蒼厓老樹長千尺。挂著山精薜蘿衣。紅葉黃花惜日晚。溪風山雨送人歸。

林元協一首

元協字子彥。太平人。

聞詔起遷謫諸臣

金雞飛詔下長安。逐客逢時又拜官。投杼固知人語誤。賜環真見主恩寬。十年孤憤朱雲檻。一日清塵貢禹冠。獨倚高樓瞻魏闕。浮雲散盡露溥溥。

毛子亨一首

子亨字懷士。太平人。

貧居

昨夜風吹茅屋破。衾寒被澀不得臥。朝來縮頸怕出門。道旁老狐見人怒。山南荳苗半枯死。抱甕欲汲溪無水。咽乾喉急暮來歸。小兒索食牽我衣。

蔡鈺一首

鈺字邦奇。太平人。

歲暮粵歸

菖陽石上花不發。歲晏他鄉歸去來。妻子嗔予淹道路。田園今日長蒿萊。不憐鬢髮經時短。只訴饑寒到骨哀。喜有高松夾窮巷。柴門依舊對山開。

鄔佐卿一首

佐卿字汝翼丹徒人有纏頭集十卷

筆精。汝翼性豪爽。喜遊俠邪。著述甚富。自文集外。有豔詞十卷。題曰纏頭集。皆生平贈妓之作。佳句麗情。可歌可詠。笛中舊恨。留金谷。天上新愁。問玉卮。江柳眉梢雙鎖恨。海棠春盡獨銷魂。寶鏡夜寒鸞顧影。畫梁春煖燕歸樓。妝粉曉沾蝴蝶草。噉紅春染杜鵑枝。鬢梳蟬影分雙翼。衣翦靈縉學六銖。小閣題情織荳蔻。空庭微步出蓮花。樓前彩鳳隨仙史。陌上銀箏悞使君。春回漢水思捐佩。月滿秦宮照捲衣。玉樹輕霜凝屈戌。垂楊新月挂鞦韆。楊柳調翻歌扇月。柘枝香度舞裙風。明月小樓關盼盼。垂楊深院李師師。等聯。脗炙尤甚。義山無題之後。亦不多見也。

宮詞

複道傳呼御輦過。遙聞仙樂動雲和。黃金縱買長門賦。逝水終慚太液波。

顧斗英三首

斗英字仲韓上海人有小菴羅集六卷

筆精。華亭莫廷韓。上洋顧仲韓。皆奕奕才情。份份辭麗。稱雲間二韓。廷韓文名滿天下。仲韓詩僅有存。人莫能名者。仲韓少有

鶴才。磊落不羈。窮服餓。嫫聲色。選伎徵歌。座客常滿。日費萬錢不慙。每出輒載與俱。畫舫旅棧。盆卉圖書古尊。疊畢具。竟以此傾父賞。鬱鬱貧病以死。余薄遊海上。始知有顧仲韓。而墓草宿矣。詩多憐風日。狎池苑。大都流靡以自妍。傷其才而不遇也。

臥病感懷

較嵇還復懶。擬庾更多愁。拙笑安蛇足。癡真類虎頭。捫胸開五嶽。搖筆吐千秋。不解干人策。文園豈倦遊。

送僧入關

西竺初傳法。東林復閉關。齋心修白業。投老寄青山。彌勒分龕坐。闍黎乞食還。自應無退轉。玄論許誰攀。

秦淮小姬

一片春山乍學描。纏頭初試紫霞綃。章臺無數青青柳。最惹東風是嫩條。

袁敬烈二首

敬烈字無競。閩人。知府表子。有臥雪齋集。

邊上送故人

送君歸故國。而我滯邊州。日落鄉心遠。猿啼關樹愁。秋風沙磧馬。夜月海西樓。羌笛數聲起。那禁雙淚流。

紅葉怨

宮水潺湲出御溝。拭將殘淚寫新愁。誰言一葉傳情易。載得愁多卻不流。

王湛一首

湛字汝存。閩縣歲貢生。有王生詩。

楊白花

楊花不戀枝。飄蕩向南去。願得迴颿生。吹花還故處。

梁天佑一首

天佑字以德。一字龍田。浦城人。

龍臥寺步葉進卿韻

龍臥精藍別有天。尋真到此亦清緣。空山雲與客爭路。古寺鳥同僧話禪。隔代題名滋碧蘚。逼人怪石聳青蓮。老來擬此營精舍。愧乏前人布地錢。

沈翰卿一首

翰卿字子羽。江陰人。

明詩統子羽嘗游吳。一時名士多與之遊。詩名滿吳下。

與石洲遊高座寺

檻前修竹弄晴暉。木杪層巒鳥道微。並轡遠遊紅葉寺。入山頻扣白雲扉。咄嗟世網吾將避。寂寞空門願

所依。一笑偶逢陶陸輩。遠公蓮社幸同歸。

明詩紀事卷三十下

庚籤

袁崇冕一首

崇冕，號西野，章邱布衣。

池北偶談：西野以布衣終工金，元詞曲與李中麓唱酬。

十月始見菊

怪爾清姿消瘦盡，冷風疏雨亦淒其。元冬乍見真成晚，白首相期亦未遲。雲暗郡城愁獨坐，日斜鄉國望移時。樽前摘索原因醉，燭底歌吟轉更悲。

王留七首

留字亦房，吳人。釋登子，有匏葉、燕載遺稿等集。

列朝詩集：亦房，伯穀之少子也。年十五游金陵，作舊京篇，父客皆歎異，以爲文考復出。伯穀沒後，不得意於文戰，肆力爲歌詩。曲周劉敬仲、南陽馬仲良最相矜重，仲良之持論，欲爲調人於李、何、袁、鍾之間，以才情風調，自樹赤幟，而獨深推亦房，以爲狎主齊盟，無兩子也。仲良亦房相繼卒，年皆未四十，亦房之生也晚，未能傳習其家學，而又侵淫於時調，橫從跌宕，於先人之矩矱，遂將傾而去之，轉入惡道中矣。

送費元朗下第歸樵李

淪落雖然慣。羈愁一倍新。欲忘難遣事。但較不歸人。凍水藏河面。乾沙擁樹身。酒家經漸熟。應笑往來頻。

贈朱康侯王孫

南州王孫盛文藻。用晦云亡鬱儀老。如君繼起方少年。五言清真尤覺好。我父牛臣凌中原。君家二老相推尊。君今懷刺復相訪。直謂貧士非王孫。告我經年作游計。千里齋糧託孤詣。戒僕還須變姓名。逢人豈復誇門第。行裝羞澀氣瀟灑。三尺胡琴一羸馬。但聞朋友便交歡。每到山川卽描寫。浪傳腰玦青珊瑚。布衣蕭然何所殊。長揖那曾傲漁釣。低頭不敢爭屠沽。我亦寄游不停輟。袖裏懷書覲宮闕。瓣香慷慨拜荆高。杯酒殷勤酌毛薛。所思廬山未得從。詩中想見香鑪峯。君行便欲躡之去。同聽東林煙寺鐘。

田按。周櫟園書影云。亦房略有才情。走入寬道。余在閩中。見其詩刻種種。無一語及其父百穀者。詩文卽不同調。何致自昧人倫若是。今錄亦房贈朱康侯詩云。我父牛耳凌中原。君家二老相推尊。可爲亦房一解此誕矣。

送劉其奇歸豫章約予

留滯空憐客計窮。舟行未必與君同。汀蘆正密喜新雁。田草將衰愁亂蟲。獨夜有懷偏避月。長年無力但需風。遙知詩句偶成處。多在小村燈火中。

送楊修齡侍御按黔時方用兵

疏雨濃雲暗遠郊。南征慷慨誓前茅。山根野火懸孤戍。木末人烟據險巢。萬里鼓笳迎六傳。兩階干羽待三苗。應知日有千言就。記得歌名或是鏡。

初冬客懷二首

故園消息杳難憑。寄食栖栖百慮增。貧士驕人猶勝諂。庸流愛我不如憎。殊方得病醫無力。獨夜成眠醉始能。身賤敢從同學較。任他裘馬自相矜。傍澗誅茅十畝宮。主人閒卽住山中。藥苗飽雨分畦綠。楓葉酣霜合隴紅。半夜樵歌寒趁日。六時僧磬響因風。如今徙倚都門望。凍草僵沙是處同。

崑山訪王世周不遇

小築宛如江上村。階前徑尺青苔痕。偶然繫艇一相訪。惟有寒潮同到門。

卜筮年三首

舜年字孟頌。吳江人。僑寓嘉興。諸生有綠曉齋詩集。

靜志居詩話。孟頌家盛澤。幼赴嘉興童子試。時安福顏欲章知縣事。亟賞其文。拔置第一。遂補諸生。讀書東塔寺。尋游陳仲澗之門。負才傲世。恆衣苧衣入市。題其門曰。鄉人皆惡。國士無雙。惟與同里張汝培。端甫結契。時相倡和。孟頌既失意。坎壈不平。仿屈平楚辭作酒酒章。假帝語河伯之文。有曰。東聯淄汶兮。南絡沅湘。黑者銜白兮。弱者間強。災旣淪於入坎兮。害乃基於剝。牀翹商羊之子舞兮。又安視俄鳳之踰跲。固帝心之欣福兮。亦今俗之好殃。又聞杜松。劉縱二將喪師。賦長謔千餘言。以詬楊

鑄。平居好結客。客至必留坐。是奇窘。或三日不爨。終不乞米於人也。詩尚崛奇。間有合律者。

百城煙水。孟碩貢才任誕。嘗爲詩云。誅虱等羣小。放鶴得身遊。謂橋李蔣之翹曰。此生平得意句也。客遊虎邱。值大雪。徑無人迹。忽千人石上歌聲遏雲。科頭挽雙髻。一長鐵釘簪之。身穿紅布直裰。乃孟碩也。雅好點染。余友蔣洪吉述其當月明之夜。往往兀坐樹下。想像煙林。達曉不寐。故其運筆。磅礴淋漓。髮髯有仙氣。余曾見一單幅。畫落月於叢樹藤蘿之中。光芒四映。對之爽氣拂襟。信斯言之不謬也。

鑿餘叢話。鄭諒伯新刻其鄉先輩卜孟碩綠曉齋詩集四卷見寄。卜沒於萬歷時。年僅三十二。頁才佚盪。振奇好異。不屑與俗同。使老其才。或能與文長。次梗相上下耳。五律句。如沙昏秋雁落。潮滿夜漁歸。五湖新水發。一棹故人來。鶴鶴沐松露。房廊穿竹風。皆自然高勝。

宿鷺湖

鷺湖日墮波餘紫。青翰舟留白沙嘴。半夜潮生枕簟間。遙林月到篷窗裏。呼出漁郎張志和。瓦盆白酒發高歌。平明共爾升元圃。回首吳山青一螺。

山家

水滿失灘沙。雲開曳彩霞。晴來閒晒藥。雨後急收茶。鶯坐一身柳。蜂歸兩股花。人言無事得。多事最山家。

晨起湖上

紙窗清映盛湖曉。窗裏宿雲溫欲飛。湖鳥呼羣動高柳。山鷄唱闌開矮扉。春濤十里牙橋細。夜雨一園蔬。

甲肥自信直鉤長。罷釣無魚不與素心違。

邵潛二首

潛字潛夫。南通州人。有邵山人集。

池北偶談。邵潛夫性傲僻。不諧俗。人多惡之。所著友誼錄。循吏傳諸書。多可傳者。年老無子。客如舉城。年八十餘矣。予過訪之。茅屋三間。黝黑如漆。邵筋骨如鐵。白髮鬢鬢被領。雙眸炯然。與修禊昌氏洗鉢池。尙能與予輩賦詩。

田按。潛夫家貧。不善治生產。既喪婦。續娶里中小家子也。庸奴其夫。求去。晚貧甚。僅僅拾橡剉薦以自給。性卞急。與人語。稍抵牾。輒謾罵。嘗與鍾竟陵舟中。面詆其密友譚元春。又嘗過虞山。謁錢宗伯。稍待久之。卽罵闖者而去。博覽多通。爲潛夫別集。鳴錄循吏傳。引年錄志幻錄。余皆得見之。詩五言有可錄者。陳迦陵亟稱之。不能副其言也。

奉送周使君伯二

人生易超忽。聚散良有時。念與知己別。氣結難爲詞。神交義不薄。出札恆見之。願展嬾婉情。千古與等期。飄風從東來。浮雲倏西馳。奄然一相失。悵悵使心悲。貧士代失職。懷瑾誰當知。感激平生意。淚下空漣洏。月夜同王夢。叟過水月閣。訪周夢翁。

陳元素一首

元素字古白。長洲人。諸生。

無聲詩史。古白以文學知名於時。書法清勁。類歐率更。寫墨闌有楚畹清芬之致。

何仲先移家維亭

周親於我更芳鄰。徙宅超然遠市塵。路出東門船似馬。湖當前浦浪如銀。誰能父子相師友。豈少賢豪互主賓。潮到此亭曾有識。知君才不讓前人。

趙宦光一首

宦光字凡夫吳人有寒山雜著

百城煙水寒山別業在支硎山南。萬歷間。雲間高士趙凡夫。葬父含元於此。遂僭元醜陸卿子家焉。自闢邱壑。鑿山琢石。如洞天桃源。前爲小宛堂。茗椀几榻。超然塵表。盤陀空空。化城法螺諸庵。皆其別墅也。而千尺雪尤爲諸景之最。子靈均。一傳後。改精藍。葛彌光贈凡夫詩云。松風二十里。花田野棠村。已是山深處。無嫌客到門。廬中半生住。海內一家言。雨壑看飛瀑。雲巖石根。鄧雲霄贈詩云。宦海嗟無岸。名山別有春。遙從棲隱處。再覓姓龐人。野鳥時窺客。幽花不笑貧。坐鄰支遁宅。今古並芳塵。馮時可同申少師飲凡夫齋中云。緬懷新築勝。丹閣俯嶙峋。閒挈山中相。幽尋世外人。瀑飛剡溪雪。花發武陵春。便欲移家住。於斯并采真。吳夢暘凡夫邀宿山居云。昏黑從君返。懸燈客入門。房廊營石骨。窗戶瀉波痕。四壁白雲靜。中庭青草繁。問余能領略。搔首自忘言。范訥贈凡夫云。無路覓君去。亂峰雲若屯。嵌空巢樹杪。鑿沼露山根。畫遣兒摹勒。詩從婦討論。墓田何太近。宿草接開門。林雲鳳春日趙家山詩云。出郭不知遠。入山轉覺幽。與樵爭嶺路。隨鶴到林邱。瀑水當門雨。松陰滿地秋。人間正多事。何日復來遊。

柴門

編荆可當門。疊石能爲牆。青山露牆上。野花牆下香。

茅維二首

維字孝若。歸安人。副使坤子。萬歷乙卯舉人。授翰林孔目。有十賚堂甲集五卷。乙集十八卷。菰園集六卷。佩觿。閩遊草一卷。

屠隆南有堂集。孝若爲漢。魏則漢。魏爲六朝。則六朝爲初唐。則初唐。其於體靡不合。間爲唐之中盛。雄雉悲壯。龍劈海而騰搏。空也。

列朝詩集。萬歷間。茗之稱詩者。臧懋循晉叔。吳稼澂翁晉。吳夢暘允兆。而孝若與之抗行爲四子。有十賚堂集數十卷。流覽篇。帙才調斐然。以檢括爲難耳。嘗以所作雜劇屬余序。已而語人曰。虞山輕我。近舍湯臨川。而遠引關漢卿。馬東籬。是不欲以我代臨川也。其稟兀如此。

田按。孝若古詩。清真頗近宋人。

友人寄餉芥茶

坐久碧窗下。幽燈散林影。故人有芳訊。特餉一函茗。山僮見採摘。重趼歷巖頂。陽巖抽碧枝。土瘦香倍猛。澤蘭沃其根。氣韻幽以靜。量水手自煎。槍旗沸若鼎。瀉之白玉磁。乳花浮耿耿。乍傾色若無。稍貯味逾迥。七椀清風颺。一啜胷滓冷。何用金沙泉。自陋建陽餅。世以方虎邱。品置豈平等。不願封雲溪。願得芥一頃。紫筍日作供。水厄呼不醒。大笑毀茶論。空傳竟陵井。

試芥茶

夏雲鱗花木霽。曉坐北窗繞花氣。阿顏攜茶至芥巔。采焙皆云親手製。裊露朝采山之陽。篝燈夜焙不盈器。香味略有數種殊。活火新泉請君試。急量雪水貯花瓷。蠹蠹槍旗鼎邊湍。乍傾縹碧殊氤氳。亂瀉荷珠盃中墜。舌本未辨清甘迴。鼻端但覺奇香帶。洞山廟後相等夷。小芥一罌尤絕異。問之老梗抽紫芽。沙瘦崖高衆皆棄。阿顏叩頭服主人。請出諸茶盡品次。大馮開常嘆茶道嚴。玉川未解此中祕。古人品茶重花乳。細碾龍團如餅餌。今人品茶重色香。縹緲虛無第一義。松蘿如入法官廚。天池如過五都市。龍井顧渚差蘊藉。一再啜之少餘思。虎邱天然冰玉姿。藐姑仙人見者避。不如明月峽中芥。落落穆穆高韻士。隱囊揮塵支許倫。居然名理饒玄致。吳儂四月櫻筍熟。桑柘映空撲衣翠。草堂無事日讀書。自領山童課茶事。企腳呼點蟹眼湯。蕙蘭九畹澆胸臆。欲草茶志無煩言。庶惟澹者標其意。

吳拭四首

拭字去塵。自號逋道人。休甯人。有武夷集。百粵紀遊諸稿。

藍圍山響閣讀畫錄。逋道人翰墨各極精妙。畫師米顛。而固有潔癖。暇水殘山。今如廣陵散矣。

列朝詩集。去塵居新安之上山。宗族多富人。去塵獨好讀書鼓琴。布衣芒鞋。寥然自異。輕財結客。好遊名山水。從曹能始自楚之黔。覽勝搜奇。歸攜一編以誇示里人。里人爭目笑之。傲易水法製墨。遇通人文士。倒囊相贈。富家翁購之。輒大笑曰。無以孔方兄辱吾客卿也。坐此益大困。耳聾頭眩。爲悍婦所逐。落魄遊吳門。遇亂。死虞山舟中。毛子晉爲收葬之。去塵有不寐詩云。莫

怪故人消息斷。誰教金盡見床頭。視張謂黃金不多之句。尤爲淒切也。

晚步

步出斜陽盡。微涼竹林滿。溪迴山影空。雲斷夕光遠。引策散行蹤。隨心恣幽懶。日出夜遙遙。疏鐘到孤館。

清遠峽

雨過山氣清。兩岵望相峙。樹裏出鐘聲。烟澄滿江水。熠熠林光中。露重滴松子。

訪戈莊樂不值

經時相過又成虛。數樹支門綠有餘。在野不知三代往。入城安可一朝居。道書挂向梧桐壁。破硯行懷薜荔裾。誰謂古人不可及。古人當恨不君如。

小重陽日偕蘭如孟芳過訪毛子晉

秋葉風飄露有香。野籬花發小重陽。愁予酒力難通夜。喜子詩名已擅場。柳葉挂門搖夕照。池波隔檻射秋光。須知生有山僧共。歲暮心期不可忘。

寇學海四首

學海字巨源。廣濟布衣。有寇山人遺稿。

陳文燭二酉堂集。寇山人詩。才雄格老。尤長近體。如懷村居。則溪雲侵座冷。山雨入簾疏。懷謙之。有從來詞賦人多忌。莫怪江

湖我獨醒。遂宵甫。有帝自非熊先得兆。士雖屠狗亦銜恩。人多誦之。

二餘齋初成漫賦

卜居無定業。小築似蝸廬。日夕散鄰牧。水澄窺澗魚。落花人醉後。種竹雨來初。未敢追前躅。貧哉常晏如。

長安秋日移居

羈懷不可道。秋至日堪哀。問舍鄉仍遠。登樓賦懶裁。黃金與交盡。白髮共年來。多少飛揚意。寥寥落酒杯。

秋日

生事於今不可言。西風瑟瑟滿平原。腰間七首明如雪。欲向何門說報恩。

冬夜懷人

畫角聲中更漏殘。病軀孤坐地爐寒。可憐今夜霜天月。何處愁人馬上看。

沈承一首

承字君烈。太倉州人。諸生。有卽山集六卷。

田按。君烈小有才名。然誦其得意句。如鐘聲奪夢尾。晨光抹檐額。亦當時公安派之下乘也。

過趙凡夫山居

橫抱山爲枕。平邀樹作家。春風吹客至。踏破一欄花。

張大復一首

大復字元長崑山人有梅花草堂集

田按元長崑山人物傳四庫總目稱其敘述雅潔又有梅花草堂筆談遺聞瑣事頗賴以傳

霽

閒看草木生如怒戲潑湯茗味政新從此韶光知幾許風風雨雨莫愁人

朱鷺二首

鷺初名家棟字白民吳人有青浮子髯額

靜志居詩話白民負奇嘗獨遊黃山遠尋嵩華所至畫竹以自給家居撰建文書法擬思進呈請復革除紀年不果崇禎初驢入都上所作甘露頌不果歸結茅於郡西華山蓮子峯下躬親井臼不願見貴人年八十餘乃卒是時隱居者王在公芥菴趙宦光凡夫稱吳下三高而敦古節者白民爲最文文肅特誌其墓

題蓮子峰

登峰問蓮子古路出僧家石榻留雲供空池長佛花

答王芥菴

不是看梅客還爲一宿禪多君留好句相見妙高巔

李之茂一首

之茂、潞安人。見謝四溟詩話。

元日過柏墩僧舍憶謝茂秦

索居無歲事。騎馬入禪林。勝地堪逃俗。名香可淨心。偶思靈運句。暫與惠休吟。庭樹來山鳥。當春多好音。

齊萊名一首

萊名、字朱草。桐城人。諸生。有青莎館集。

懷懷歌

憑欄夜候歡。望歡歡不來。安得如春風。時時入歡懷。

孫穀一首

穀、字子雙。華容人。

沅湘耆舊集。子雙著述甚富。嘗雜採舊文。分爲四部。名微書。一曰樊微。輯秦漢以前逸書。一曰綫微。輯漢晉間箋疏。一曰闕微。徵皇古七十二代之文。一曰刪微。採尙書十一種。春秋十一種。易八種。禮、樂、詩三種。論語四種。孝經九種。河圖十種。洛書五種。統謂之古微書。又著唐紀七十卷。以新舊唐書躋駁多。其所指摘。皆當體例。今均佚。僅存刪微一種。獨被微書之名。凡三十六卷。四庫目錄稱其書能使學者生千百年後。猶見東京以上之遺文。以資考證。其功良不可沒。朱氏經義考。感諱一門。其所引。據出微書者十之八九。則用力亦甚勤矣。

讀史

出門生慷慨。閉戶傷幽獨。展轉閱良史。聊用舒心曲。豈知古人書。含茹多局促。金、張、修、漢、爵、王、謝、糜、晉、祿。紛有獨行者。嘿嘿隱玄樸。文字或浪傳。傳聞多實錄。當日佚厥真。後禩曠誰續。所以集華子。赫奕誇人目。稷、禹坐可期。何論顏、曾、躅。

專

